

萬有文庫

第一集一千種

王雲五主編

本草綱目

(九十二)

張紹棠重訂

商務印書館發行

目 綱 草 本

(九十二)

訂重棠紹張

書 叢 本 基 學 國

本草綱目

拾遺卷八

果部下

諸荔枝

陳定九荔枝譜。有奇荔枝。能治病。經兵燹後。亦僅有存者。今錄之於左。以備用。

粵語。南方離火之所出。荔枝得離火多。故一名離枝。亦曰麗枝。麗離也。文從兩日。天地之數。水一而火二。故麗從兩日。日爲五行之華。月爲六氣之精。日麗乎支。猶之乎日出於扶桑也。麗枝乃震木之大者。震木以扶桑爲宗子。而麗支其支子。故曰麗支。日出於離。離盡午中。故麗支以夏至熟。離爲坤之中。其色黃。故曰黃離。麗支之核。外赤內黃。則黃離之美也。坤之中其味甘。故曰甘節。麗支之肉少酸多甘。則甘節之吉也。荔枝以臘而萼。以春而華。夏至而翕然。子赤。生於木而成於火也。皮紅肉白。而核復純丹。火包其外。復孕其中也。肉白爲金。金爲內外火所煉。故味醇和而甘。其液乃金水之精。甘又屬土。備五行之粹美。而以火爲主者也。粵以火德王。凡花多朱色。皆火花。實多朱實。皆火實。太陽烈氣之所結。火實之屬。凡百種。而荔枝爲長。火爲母。荔枝則火之長子也。荔枝多食。未嘗傷人。飲蜜一杯。卽解。或以青

鹽調白酒飲。或飲荔支酒過醉。則以荔支殼浸水飲之。又荔支多露。有過食者味爽。就樹閒先吸其露。次嚙其香。使氤氳若醉。五內清涼。則可以消肺氣。滋真陰。卻老還童。○荔支歲初而蕾。二月而花發。發時多電。則花落實小。多雨則花腐。少雨則花液相膠而不實。估計者視其花以知其實多少。而判之。藏荔支法。就樹摘完好者。留蒂寸許。蠟封之。乃翦去蒂。以蠟封翦口。以蜜水滿浸。經數月。味色不變。

保和枝。產泉州北陳巖山蓮花峯。實大色黃。可消胸膈煩悶。調逆氣。導營衛。其核燒灰酒下。可已痢。止腹痛。

回春果。產漳郡康仙祠。葉大如掌。色翠。與衆荔殊。其實味苦澀酸辣。不可口。采以浸酒。能已風去癘。

治癩如神。葉亦然。以上
閩產。

紫玉環。產四川瀘洲。曝乾。啖一枚。可除瘡癘。即早行大霧中。嵐氣不得侵也。以上
川產。

玉露霜。產廣東新會崖門山。白殼丹肉。不摘。經冬不落。其味甘酸。啖之止咳。降肺火。療怯症。

妃子笑。產佛山。色如琥珀。大如鵝卵。核小如豆。漿滑如乳。啖之能除口氣。使齒牙經宿猶香。

牟尼光。產潮州大浦山中。味如乳。飲之功同參苓。以上
東產。

墨荔。產廣西平樂萬山中。皮肉俱黑如墨。味臭而苦辣。不可啖。或曰。出賀縣山中。或曰。荔浦脩仁二

邑山中多有之。味臭。有大毒。誤食之。必心腐腸爛而死。

按荔枝名品最多。有綠皮者。綠核者。有黃皮者。白皮者。三月四月七月熟者。然其性大約相同。惟此數品。治療各異。故類及之。

殼。痘出無漿。心不爽快。以荔枝殼煎湯飲。不藥良方。○王聖俞云。荔枝能理血透發分標。凡一切疹瘡不能透達。痘出模糊一片者。非此不能解表成漿。

血崩。同壽錄。用荔枝殼燒灰存性研末。好酒空心調服。每服二錢。輕者一服即止。至重者三服愈。

龍眼核附殼

綱目龍眼核主治。多言其肉。至其核之功用最廣。止載其能治胡臭。他皆未之及。又不及其殼。今悉採他本補之。

腦漏。黃氏醫抄。用廣東圓眼核。入銅爐內燒烟起。將筒熏入患鼻孔內。數次即愈。

一切瘡疥。高只元傳世方。用龍眼核煨存性。麻油調敷即愈。

治癬。祝氏效方。圓眼核二個。去外黑皮搥碎。雄黃。硫黃。陀僧。枯礬。川椒末。各三分。共爲細末。以生薑蘸擦患處即愈。○集聽方。患癬。用龍眼核去外黑殼。用內核。米醋磨搽。

滅斑生髮。張觀齋云。桂圓核仁。凡人家有。小子女者。不可不備。遇面上或磕傷及金刃傷。以此敷之。

定疹。止血。生肌。愈後無癢。若傷鬢髮際。愈後更能生髮。不比他藥。愈後不長髮也。

小腸疝氣。不藥良方。荔枝核。龍眼核。各七枚。俱燒灰。大茴二粒。炒。共爲末。好酒調下。外用生薑搗爛。

敷腎卽消。○經驗廣集治疝氣偏墜小腸氣痛神效。荔枝核炒龍眼核炒小茴香炒各等分爲細末空心服一錢以升麻一錢水酒煮送下。

念珠丸 張氏必效方治陰疝偏腫囊中疼痛難忍乳香去油淨二錢圓眼核三錢黃蠟二兩和藥末成丸彈子大分爲一百零八丸蛤粉爲衣用線穿起露一宿收貯遇症每服三九乳香湯下。

小便不通 用龍眼核去外黑殼打碎水煎服如通後欲脫者以圓肉湯飲之。

足指癢爛 藥鏡用桂圓核燒灰摻之立效。

無名腫毒 黃氏醫抄桂圓核以水調塗俱效能止折傷出血療金瘡滅斑。

烟筒傷喉 萬近蓬云凡烟管誤戳傷喉出血不止者用桂圓核去外黑皮惟取內核仁焙搗爲極細末看喉中傷處用筆管安末吹之卽定疼止血而愈屢試果驗。

治刀傷出血 殷仁趾傳方以龍眼核炒搗磨細敷之。

刀斧傷 黃販翁醫抄桂圓核不拘多少用火燒枯存性研末摻患處卽愈。

按陳杰回生集大興李振祖西平云龍眼核末敷金刃傷昔在西秦及巴里坤軍營救愈多人查本草綱目及別集本草俱未紀載可知世間有用之材自古迄今湮沒者不可勝計矣。

龍眼殼○乃龍眼外裹肉之殼本鰲黃色閩人恐其易蛀輒用薑黃末拌之令黃且易悅目也廣中桂

圓多不用薑黃拌。故今廣圓猶存本色。入藥用殼。須洗去外色黃者。敷湯泡傷。行篋檢祕。用圓眼殼煨存性爲末。桐油調塗患處。卽止痛。愈後又無斑痕。眞良方也。泉州府志。龍眼最小者呼鬼眼。龍眼是其中者。今不復識別。

蜜望

粵志。其子五月色黃。味甜酸。飄洋者兼金購之。有天桃與相類。六七月熟。大如木瓜。味甜。酢以羹魚尤善。凡渡海者。食之不嘔浪。

肇慶志。蜜望子。一名莽果。樹高數丈。花開極繁。蜜蜂望之而喜。故名。交廣錄。蜜望二月開花。五月子熟。色黃。一名望果。其類有天桃。正月開花。六七月子熟。年歲荒則結實愈多。粵謠云。米價高。食天桃。故廣人貴望果而賤天桃。貴之。故望之。蜂望其花。人望其果也。

止船暈。按船暈。北人謂之苦船。苦音庫。此症多嘔吐不食。登岸則已。胃弱人多有之。蜜望果甘酸。能益胃氣。故能止嘔暈。

蒲桃樹

羅浮志。蒲桃樹高二三丈。其葉如桂。四時有花。叢鬚無瓣。如翦出絲毬。長寸許。色兼黃綠。結實如蘋果。殼厚半指。絕香甜。核與殼不相連屬。搖之作響。羅浮湖中多有之。猿鳥含啄之。餘隨流而出。山人阻水。

取之動盈數斛。以之釀酒曰蒲桃春。經歲香不減。作膏尤美。

荸薺粉

童北硯食規。出江西虔南。土人如造藕粉法製成。貨於遠方。作食品。一名烏芋粉。又名黑三稜粉。

甘寒無毒。毀銅銷堅。除腹中痞積。丹石蠱毒。清心開腎。去肺胃經溼熱。過飲傷風失聲。瘡毒乾紫。可以

起發。北硯食規

野荸薺

生山土中。春有苗三葉。似韭而細。葉上有光。其根如豆大。年久則愈大。入藥用根。一名山荸薺。

磨粉水中濾過。曬乾點眼。去醫障如神。取粉忌鐵器

按山荸薺喜燥。其生必於高原。乾土尤最易蕃衍。有人移入園圃。一經汗溼。根即朽爛。然其生不易。長百年纔如錢大耳。昔客東甌。聞馬氏點眼藥粉爲天下第一。見其脩製。乃用此磨粉合海鯁目珠粉。加入藥中。著效異常。云其性能去面黝斑痣。消痞。去目星努肉。較產池澤者尤峻利也。

磨光散。種福堂方。點眼神藥。用野荸薺粉洗淨去皮。石臼中搗爛。密絹絞汁。如做藕粉法。再用清井水飛曬乾。爐甘石用黃連、黃柏、黃芩、甘菊、薄荷煎水煨。再用童便煨一次。將藥水飛曬乾。珍珠入豆腐內煮過。研細水飛。每荸薺乾粉一兩。配製過甘石五錢。珠末三錢。各將磁瓶收貯。臨用漸漸配和。加冰

片少許點之。

明目去翳秘方。種福堂方。錦紋大黃一兩。北細辛四兩。將二味用上高泉水一百二十兩。將藥入砂鍋煎至二十兩。以細絹濾去渣。用大銀盃一個盛藥。盃下以磚三塊放定。盃底下將燈盞注麻油。用燈草七根燃燈。熏盃底內。煎藥成膏。滴水成珠。每膏一兩。用野葶薺粉五錢。多些亦不妨。冰片三分。和勻作錠。如多年厚翳。每兩加水飛過蟬蛻末五分。須要去頭足泥沙。水洗曬乾爲末。水飛三次用。○又方。野葶薺粉豬胰各等分。搗和。用雞子殼半個。放藥在內。臨臥合印堂上。俟水流入目中。醫隨淚出。二十日即愈。并治田螺頭眼。

櫻桃核

今人常用以洗疹瘡。服之亦發透瘡痘。以其得春氣早。而性熱善達表也。綱目不載。豈以發風熱故耶。逢原云。櫻桃核今人用以升發麻疹。力能助火。大非所宜。春夏時尤忌入藥。用山櫻桃核佳。發麻疹瘡痘。滅斑痕凍瘡。

出痘喉啞。王永光方。用甜櫻桃核二十枚。砂鍋內焙黃色。煎湯服。

眼皮生瘤。醫學指南。用櫻桃核磨水搽之。其瘤漸漸自消。

山櫻桃

有毛與櫻桃別是一種。

辛平味劣。止瀉腸癖。除熱調中。

栗殼

綱目載其治反胃消渴瀉血。此外無他。不知其能解參之力。勝於萊菔。故急錄之。○楊春崖驗方。解人參。栗子殼煎湯服之良。

刺菱

沙角

乃小菱也。生杭西湖。裏六橋一帶多有之。以其四角尖如鍼芒。刺手故名。春盡時。兒童採取入市貨賣。菱生水中。根苗與大菱不殊。其葉下有氣管。故其性通肝腎。凡一切病多忌生冷。惟此菱不忌。最能開胃生津。其菱大者如蠶豆。小者如黃豆。味絕鮮美。雖至秋老。亦不甚大。蓋地土使然。誠水仙佳種也。○陳溴花鏡。一種最小而四角有刺者。曰刺菱。野生。非人所植。花紫色。人曝其實爲菱米。可以點茶。味甘。鮮性平無毒。生食補脾健胃。止渴生津。平肝氣通腎水。益血消食。老者煎食。健脾止洩痢。

根。利水通淋。

沙角

乃菱中一種小者。止兩角。臨平湖一帶多產之。出嘉興者。名餛飩青。以其似餛飩也。較他菱體小味甘。

沙角較餛飩菱尤小。色紅。味甘異常。

味甘平。大補脾土。不滯氣。餛飩青性寒。生食解積暑煩熱。生津。煮食健脾和胃益氣。花鏡云。遇熱而

菱藥性考。餛飩沙角生熱俱得。老則甘香。補中益氣。生者解酒。能壓丹石。

烏攪仁

出廣東。今果肆皆有市者。皮黃黑色。肉白。有文層疊如海螵蛸狀。酒筵中以爲豆蘆食品。綱目集解下云。烏攪青黑。肉爛而甘。取肉搥碎放乾。自有霜如白鹽。謂之攪醬。其子仁肥大。名攪仁。而主治所載。悉言白攪。卽今常食之青果。又所載攪仁可治吻燥者。亦指青菓核中仁而言。非指烏攪仁也。今採嶺南果錄中補其遺。按粵志木語。橄欖有青烏二種。閩人以白者名青果。粵中止名白攪。不曰青果也。白攪利微。人少種焉。烏攪下番禺諸鄉皆種之。種至二年。其秧長八九尺。必擿之。乃結實。擿至三年而子小。收十年而大收矣。其樹本高而端直。多獨榦。至頂乃布枝柯。有雌有雄。雄爲主。雌爲客。猶婦之歸於夫也。子如棗大。長寸許。光無稜瓣。先生者下向。後生者上向。八九月熟。梯子擊以長竿。或刻其幹東寸許。納以紅鹽。則其榦東子落。刻其幹西或南北亦然。古詩所云紛紛青子落紅鹽也。烏攪子大肉厚。其性溫。故味濇甘以溫。水泡軟。俟紫脂浮起溢出。乃可食。水冷則生膠。熱則肌膚反實。故必溫水和。乃醇其性。亦有婉諫之道焉。總二攪論之。白攪雄而烏攪雌。白屬陽而烏屬陰。陽故色白而行氣。陰故色紅。

而補血。惟烏者陰。故有仁可食。白者陽。故仁小而成。此其別也。
仁味甘淡。潤肺下氣。補血殺諸魚毒。

刺梨

宦遊筆記。刺梨形如棠梨。多芒刺不可觸。味甘而酸澆。漬其汁同蜜煎之。可作膏。正不減於櫨梨也。花於夏實於秋。花有單瓣重臺之別。名爲送春歸。密萼繁英。紅紫相間。植之園林。可供玩賞。獨黔中有之。移於他境則不生。殆亦類優曇花之獨見於南滇耶。

食之已悶消積滯。筆記

枇杷核

本經逢原云。枇杷其核大寒。伐肝脾。以之同落蘇入麩醬。則色青翠。同蟹入鍋。則至熟不赤。性寒走肝。可知。敏按石頑所說。以其核能駐色不變。斷爲性寒。不知枇杷獨具先天四時之氣。其性溫平。其核能化一切毛羽。觀花圃人貯雞鵝毛水。以灌花者。患其難化。輒擣枇杷核數枚。投於缸水中。不三日。則雞鵝毛皆爛化。知其直走厥陰。更捷利也。

治肝有餘諸症。氣實者可用。

敏按祝士校遊戲方。枇杷核煮蛤蚧能脫了。則其性又善離。蓋枇杷具四時全氣。其實能令分者合。故

肺嗽能斂核能令合者離。故肝實可疎。一合一離。正見互爲乘除之妙。物理小識。枇杷核能去黴垢。故能化痰。

羊桃

粵語其種來自大洋。一曰洋桃。高五六丈。大者數圍。花紅色。一蒂數子。七八月間熟。色如蠟。一名三斂子。亦曰山斂。斂。稜也。俗語誤稜爲斂也。亦以其味酸能斂顏色也。有五稜者。名五斂。以糯米水澆則甜。名糯羊桃。廣人以爲蔬。綱目五斂子。卽羊桃。惟言其主治風熱。生津止渴。他功效皆未及。今依粵語補之。○爾雅長楚。桃。註今羊桃也。或曰鬼桃。葉似桃花。白子如小麥。亦似桃。陸機疏云。葉長而狹。花紫赤色。其枝莖弱。過一尺引蔓於草。上。鄭氏曰。藤生子赤。狀如鼠糞。故亦名鼠矢。兒童食之。一名羊腸。一名御弋。蜀本圖經。子細如棗核。苗長弱蔓生。不能爲樹。今呼爲細子。根似牡丹。羣芳譜。羊桃。福州產。其花五瓣。色青黃。詩。檜風。隰有萋楚。猗儺其枝。卽指此也。

酸甘。瀟平無毒。久食能辟嵐瘴之毒。中蠱者。搗自然汁飲。毒卽吐出。脯之。或白蜜漬之。持至北方。不服水土。與瘡者。皆可治。○嶺南雜記。有食豬肉咽喉腫痛。食羊桃卽解。

藥性考。羊桃生時極酸。不可食。熟則帶甘。過食寒中。內熱者宜之。多食冷脾胃。動洩瀉。可曬乾。歌曰。獼猴桃。寒酸甘。止渴調中。下氣解煩。除熱骨節風痛。能壓丹石。通淋療痔。瓢可煎食。

倒捻子

綱目都念子。卽倒捻子。僅言其治痰嗽氣。暖腹臍。益肌肉而已。時珍曰。食之必倒捻其蒂。故謂之倒捻子。訛爲都念子也。味甚甘軟。粵語都念子。樸樹叢生。花如芍藥而小。春時開有紅白二種。子如軟柿。外紫內赤。亦小有四葉承之。子汁可染。若胭脂。花可爲酒。葉可麴。皮漬之得膠。以代柿。蘇子瞻名爲海漆。非漆而曰漆。以其得乙木之液。凝而爲血。可補人之血。與漆同功。功逾青黏。故名。以其爲用甚衆。食治皆需。故名都念。產羅浮者。高丈許。子尤美。嶺南酒有以花爲釀。而雜以諸果者。花則以檳榔花爲最。果則以倒捻子爲最。倒捻子。又名黏子。花於暮春。實於盛夏。諺曰。六月六。黏子熟。熟以爲酒。色紅味甘。人與猿猴爭食之。所在皆然。

東坡雜記。吾謫居南海。以五月出陸。至滕州。自滕至儋。野花夾道。如芍藥而小。紅鮮可愛。樸樹叢生。土人云。倒黏子花也。至儋則已結子。爛紫可食。殊甘美。中有細核。嚼之瑟瑟有聲。亦頗苦沁。兒童食之。使大便難。野人夏秋下痢。食葉輒已。

子活血補血。研瀘爲膏。餌之。又止腸滑。

甘蔗滓皮

綱目甘蔗條。瀕湖特補蔗滓。言其治小兒白禿。燒烟入目。令目暗。其他未能悉。今復廣之。

救生苦海。收口長肉。背疽惡瘡。用之屢效。收甘蔗滓曬燥。煨存性。研極細。以小竹管如瘡口大者一個。以細夏布紮緊於上。篩藥填滿瘡孔內。膏藥蓋住。自能收口。

醫鍵云。對口一名鼻疽。用甘蔗滓焙燥爲末。白色狗屎焙末。和勻。將竹管一個。稀絹包竹管頭。入藥篩膏藥上貼之。垂死者亦生。

痘疔。經驗單方。用甘蔗滓曬乾。真香油點燈燒成灰。以津液調勻。銀簪挑破點上。立效。一方加珍珠油胭脂調塗。更效。○敏按蔗有數種。紫皮者名崑崙蔗。青皮者乃扶風蔗也。黃海若云。凡痘疹不出。及悶痘不發。毒盛脹滿者。此痘屬急症。宜青皮甘蔗榨汁與食。不時頻進。則痘立起。其寒散解毒之功。過於蚯蚓白。鴿惜人不知其功用。入藥如用滓。亦宜以青皮蔗滓爲上。

蔗皮。綱目止載治口疳。而不知其皮可入香料。海外三珠有四葉香餅。乃用蔗皮。又乾者墊臥。可去鬱熱。本草匯有接氣沐龍湯。亦用其皮。故爲補其說。

臘梨初起。百草鏡。紫甘蔗皮煨存性。香油調搽。

接氣沐龍湯。專治陽衰久痿滑精。不用內服。惟主外治。大約患此者。或由稟弱。或由縱慾。或憂鬱所致。或心腎不交。用此最妙。紫稍花。甘草。甘遂。良薑。文蛤。母丁香。巴戟。天川。烏附子。吳茱萸。川椒。細辛。淫羊藿。蛇牀子。棟樹子。甘松。各一兩。瑣陽。茯苓。官桂。羊皮。紅蔗皮。滿山紅。罌粟殼。水泡去筋。各二兩。紅豆。

七十粒。須擇酒藥內所用辣者。白頸蚯蚓七條。炙。倭鉛八兩。切薄片。勻七劑。每日一劑。瓦鍋內煎湯。先熏後洗。以冷爲度。晚重溫藥湯再洗。如此七日內禁房事。

坐板瘡。甘蔗皮燒存性。香油調塗。家寶方。

竹衣乖。經驗廣集。此藥治竹衣乖。并無皮膚。膿血淋漓。赤剝楊梅。一切胎毒。用爐甘石煨淬。入黃連汁三次。童便四次。一兩黃蘗豬膽塗炙七次。紫甘蔗皮燒存性。孩兒茶。赤石脂。各五錢。菘豆粉炒七分。冰片五分爲末。先用麻油將雞蛋黃煎黑。去黃候冷。調塗卽愈。

猴鬪子

宦遊筆記。出臨海深山茅草中。土名仙茅果。秋生冬實。樵人採食。并可磨粉。其性溫補。然城市亦無食之者。綱目有猴騷子。形與此別。又臨海出猴總子。一名土柿。每年九十月開生。形與紅柿同。皆非一物。臨海異物志。猴鬪子如指頭大。味苦可食。他處所無。性溫。暖丹田。益五臟。健脾。增氣力。

瓜子殼

傳信方。治腸紅不論新久。三服全愈。用地榆炒黑一錢。白薇一錢五分。蒲黃炒黑一錢。桑白皮一錢五分。瓜子殼二兩。煎湯代水。不藥良方。單用瓜子殼一味煎服。治腸風下血。

吐血。不藥良方。瓜子殼一茶鍾。煎湯一盃。喫下。血卽止。

蒲桃殼

止呃忒如神。

橙餅

同壽錄有製橙餅法方。擇半黃無傷損橙子。太青者性硬難酥。將小刀划成棱。入淨水浸去酸澀水。一
二天。每日須換水。待軟取起。擠去核。再浸一、二天取起。將簪腳插入每縫。觸碎內瓢。然後入鍋用清水
煎之。勿令焦。約有七八分爛。取出。拌上潔白洋糖。須乘熱卽拌。卽日曬之。待糖喫進。再摻再曬。令糖喫
足。將乾糖再塞入橙肚內。略壓扁。入瓶貯用。亦可點湯服。

消頑痰降氣。和中開胃。寬膈健脾。解魚蟹毒。醒酒。若氣虛癩癰者勿服。

津符子

產緬甸。見千金方。

味苦平。性滑。主益心血。養肺金。止渴。生津液。多食口爽。失滋味。安和五臟。久食輕身明目。治瀉痢不止。
男女虛勞。咳嗽吐膿血。肺癰肺痿。聲啞欲死者。每日喫十枚。一月不閒斷卽愈。

必思答

產回回國地見忽必烈飲膳正要

味甘無毒治調中順氣滋肺金定喘急久食利人三陰瘡百藥不效必思答三枚酒一盞煎半飲之即止

難產不下或子死腹中必思答七枚酒煎服之即下又治胞衣不下

黃皮果

廣志黃皮果狀如金彈六月熟其漿酸甘似葡萄與荔支並進荔支饜飮以黃皮果解之諺曰飢食荔支飽食黃皮綱目於果部附諸果條下僅引海槎錄云出廣西橫州狀如棟子及小棗味酸至其功用並未之及焉今依廣志補之

消食順氣除暑熱廣志酸平無毒主嘔逆痰水胸膈滿痛虻蟲上攻心下痛食物本草

敏按廣東瑣語載果中有白蠟子與黃皮果絕相似而味尤勝諺有云黃皮白蠟甜酸相雜想功效亦不甚遠也

廣東通志黃皮果大如龍眼又名黃彈子皮黃白有微毛瓢白如肪有青核數枚甚酸澀食荔支太多用黃皮果解之

甘劍子

狀如巴欖子。仁附肉。有白鬚。不可食。能發人病。北人呼爲海胡桃。味甘氣烈。治脾胃虛寒。食少洩痢不止。形體尪羸。洩下虛脫。百方不效。用甘劍子七枚。連殼煨爲末。空心酒下。三服卽止。再服調理藥。

揚搖子

生閩越。其子生樹皮中。體有脊形。甚異。長四五寸。味甘無毒。通百脈。強筋骨。和中益氣。潤肌膚。好顏色。○花鏡。此果長五寸。色青無核。臨海異物志。揚搖有七脊。子生樹皮中。其體雖異。味則無奇。長四五寸。色青黃。味甘。

海梧子

出林邑。樹似梧桐。色白。葉似青桐。子如栗。肥甘可食。○南方草木狀。占城卽林邑。產海梧子。與中國松子同。但結實肥大。形如小栗。三角。肥甘。樽俎閒佳果也。

味平無毒。利大腸。小腸。益智慧。開心胸。明目。

心下怔忡。夜多惡夢。健忘。每日空心食海梧子十數枚。月餘自愈。

疝氣囊大如斗。海梧子七個。燒灰服之。卽愈。

木竹子

出廣西。皮色形狀如大枇杷。肉味甘美。秋冬實熟。味甘性平。治吐逆不食。關格閉拒不通。脾虛下陷。肛門墜脫不收。清熱涼大腸。去積血。利百脈。通調水臟。止渴生津。解暑消酒。利耳目。治欬嗽上逆。

櫓罌子

桂陽虞衡志。出廣西。大如半升盃。數十房攢聚成毬。每房有縫。冬生青。至夏紅熟。

味甘。補脾胃。固元氣。制伏亢陽。扶持衰土。壯精神。益血。寬痞消痰。解酒毒。止酒後發渴。利頭目。開心益智。志。

婦人不孕。用櫓罌子浸好酒內三日。日日飲之。百日有孕。又目生翳障。漸漸昏暗。視物不明。櫓罌子浸白蜜內。每日連蜜啖一枚。一月即退。

槿子

出九真交趾。子如桃實。長寸餘。二月開花。連著子。五月熟。色黃。鹽藏食之。味酸如梅。

性涼平。清心潤肺。止渴生津。制亢極之陽光。消炎蒸之暑氣。又降三焦實火。治鼻中出血。又牙宣牙齦出血。用槿子核連仁。燒存性。調水含咽即止。

羅晃子

出廣西。夏熟。味如栗。狀如橄欖。其皮七層。出橫州者皮九層。剝至九層方見肉。故又名九層皮果。

思恩府志。羅晃子。俗名九層皮。形類蠶豆。可茹。味如煨栗。外有黑殼。連肉有皮九層。故名。產於山樹中。味甘性溫。治臟腑生蟲。及小兒食泥土腹痛。癰痞積硬。

養肝膽。明目去翳。止渴退熱。解利風邪。消煩降火。翻胃吐食。或食下即吐。或朝食暮吐。暮食朝吐。用羅晃子七枚。煨存性。每日酒調下方寸匕。服完爲度。即愈。

腹中虻蟲上攻。心下痛欲死。面有白斑。用羅晃子牽牛子各七枚。水煎服。蟲自下。

夫編子

南方草木狀。出交趾武平山谷中。三月開花。連著子。五六月熟。入雞魚豬鴨羹中。味最美。亦可鹽食。味甘性平。主寧心志。養血脈。解暑渴。利水道。生津液。止逆氣喘急。除煩清熱。潤肺。滋命門。益元氣。骨蒸勞熱。四肢瘦削如枯柴。用夫編子同白鴨爛煮。不用鹽醬。日日啖之。喫鴨三頭見效。

白緣子

出交趾。樹高丈餘。味甘美如胡桃。

味甘平。主潤肺。止渴清熱消食。祛風暑溼氣。治疥癬及山嵐瘴氣所侵。變成疥瘡。寒熱往來。頭痛痰逆。足膝屈弱難行。寒溼邪氣所侵。用白緣子一片。春爛浸酒。日飲一次。月餘全愈。

繫彌子

廣志狀圓而細。色赤如軟棗。其味初苦後甘。可食。味平無毒。主益五臟。悅澤人面。去頭面諸風。產後痢疾不止。用繫彌子一合。酒水各一盞。煎八分。空心服下。片刻即效。

人面子

出海南。又出廣中。樹似含桃。子如桃實。春花夏實。至春方熟。蜜煎甘酸可食。其核兩邊俱似人面。耳目口鼻無不畢具。

廣志人面子大如梅李。其核類人面。兩目口鼻皆具。肉甘酸。宜爲蜜煎。仁絕美。以點茶如梅花片。光澤可愛。茶之色香亦不變。以增城水東所產爲佳。其核中仁搖之即脫去。他產則否。此樹最宜沙土。沙土鬆易發。數歲即婆娑偃蓋。山民植之以爲利。味甘。性平無毒。醒酒解毒。治風毒著人。遍身疙瘡成瘡。或痛或癢。食之即愈。

難產不下。產母手握人面子一個。單日右手握。雙日左手握。即下。

嶺南雜記。人面子煮肉及鴨。必用搥爛熬膏。甘酸益津。

四味果

出祁連山。木生如棗。剖以竹刀則甘。鐵刀則苦。木刀則酸。蘆刀則辛。行旅得之。能止飢渴。味甘辛酸無毒。明目養肝。寧神定志。和胃進食。下氣止欬。

腎虛腰痛。不能反側。用四味果同狗腰子煮熟並食。每日一次。一月愈。
敏按東方朔神異經云。南方大荒有樹名如何。結子味如飴。有核形如棗子。長五尺。圍如長金刀。剖之則酸。蘆刀剖之則辛。食之者地仙。不畏水火。白刃。又啓蒙記如何。隨刀而改味。或曰。此卽仙經所謂火棗。據此二說。卽今四味果也。

千歲子

南方草木狀。出交趾。蔓生子在根下。鬚綠色。交加如織。一苞恆二百餘顆。皮殼青黃色。殼中有實如栗。味亦如之。乾則殼肉相離。撼之有聲。如肉荳蔻。○關涵嶺南隨筆。千歲子多子根鬚。乾則殼肉相離。撼之有聲。

味甘平。主和中益胃。利肺。除熱止渴。醒酒解暑。

小便閉塞。千歲子十數枚。打碎水煎。清飲下。卽通利。

發背惡瘡。千歲子不拘多少。搗爛如泥。調塗三次見效。

侯騷子

蔓生。大如雞卵。味甘性冷。消酒輕身。王太僕曾獻之。見酉陽雜俎。

甘寒無毒。食之不飢。延年強健。消酒除溼。治黃疸。小便不利。溺如黃金色。口渴煩熱。齒痛牙宣。出血不

止。

小兒重舌木舌。候騷子核燒灰擦之。或用蜜調塗亦可。

浮癰發背。候騷子煎湯飲之。再搗塗之。大效。

仙人掌子

乃仙人掌上所生子也。粵語。仙人掌多依石壁而生。葉勁而長。若齟齬狀。開花儼如鳳形。子生花下。名曰鳳栗。葉曰鳳尾。笏發苞外類芋。渠內攢瓣如珠。各擎子珠於掌。一枝一掌。自下而上。子自青赤而黃。有重殼。外厚內薄。熟其仁食之。味甜兼芡栗。可以延年。又名千歲子。此草可辟火。廣人多植之。堂側。性宜沙土。惡肥膩。○明黃佐仙人掌賦序。仙人掌。奇草也。多貼石壁而生。惟羅浮黃龍金沙洞有之。葉勁而長。若齟齬狀。發苞時。外類芋魁。內攢瓣如翠球。各擎子珠如掌然。青赤轉黃。而有重殼。剖之。厚者在。外如小椰。可爲匕勺。薄者在裏如銀杏衣。而裹圓肉。煨食之。味兼芡栗。可補諸虛。久服輕身延年。俗呼爲千歲子。此與蔓生者名同物異也。○雲南通志。仙人掌葉肥厚如掌。多刺。相接成枝。花名玉英。色紅黃。實似山瓜。可食。

味甘性平。補脾健胃。益腳力。除久瀉。

敏按羣芳譜。仙人掌出自閩粵。非草非木。亦非果蔬。無枝無葉。又并無花。土中突發一片。與手掌無異。

其膚色青綠。光潤可觀。掌上生米色細點。每年只生一葉於頂。今歲長在左。來歲則長在右。層疊而上。植之家中。可鎮水災。如欲傳種。取其一片切作三四塊。以肥土植之。自生全掌矣。近日兩浙亦有。據所載當另是一種。與此全別。或名同物異歟。

酒杯藤子

出西域。藤大如臂。花堅硬。可以酌酒。文章映澈。實大如指。味如荳蔻。食之消酒。相傳張騫得其種於大宛。

甘辛平無毒。消食下氣。消酒止渴。辟邪瘡。消癰腫。殺虻蟲。治尸蛀勞瘵。蟲蠱瘰癧。瘰癧結核。癰疽潰爛。食果成積。用酒杯藤子燒灰。糖拌。服下五七錢。自效。

飲酒過量成病。用酒杯藤子煎服。極驗。

藥果

關涵嶺南隨筆。藥果似橙而味酸。可染紅。

治噦。

間子

出交趾合浦。藤緣樹木。正月開花。四五月熟如梨。赤如雞冠。核如魚鱗。

甘平無毒。主中惡氣。飛尸邪蠱。心腹卒痛。狂邪鬼神。鬼疫癘瘡。夢寐邪惡氣。心神顛倒不寧。昏冒如癡。治驚癩恍惚。或言語不倫。歌笑不休。用箇子核七枚。燒末入硃砂少許。薑湯下方寸匕。自愈。

楸子

食物考。甘酸小於沙果。色黃紅黑如櫻桃。產於代北。味頗清香。作脯點茶俱可。此與林檎同名異類。本草未分。故正之。多食瀆氣。令人好睡。子宜去盡。食之煩心。

隈支

益部方物略記。生邳州山谷中。樹高丈餘。枝修而弱。開白花。實大如雀卵。狀如荔支。肉黃。膚味甘。味甘無毒。治七種疝氣。及一切瘡瘍疥癬。

以上自津符子至隈支。止諸果品。綱目附錄諸果後。僅載其形狀。不錄其主治。而沈雲將食纂云。諸果都出外國及邊瘴地方。雖不常見。但俱屬異品。不惟可口。兼可療治百病。凡行歷遠方者。即當攜其種。流傳中土。有功於世不小。故附錄而兼細核其主治。予因取之以補李氏之遺。至其形狀。綱目已詳載。而復列之者。亦欲覽者便於解悉。後日遇物能名。故不厭重贅也。

呂宋果

本草補。呂宋島中產一果。名加空弄。外肉而內核。味苦不堪食。其初惟有一處深山峻嶺生此樹。甚高。

大土人多不識。旅人至島百年後始知其中果可用。近三十年頗悉其療治各病。極有奇驗。遂攜至中國。若果之皮肉其效尤捷。有呼爲寶豆者。豆言果之形狀。寶言其貴重也。

治中毒服毒。將果或磨或刮。以清水或清油調服。毒卽吐。蛇蠍蜈蚣等傷。磨清水服之。并刮敷患處。疫疾中風昏仆。磨水服之。腹痛瀉利。磨水服。瘡疾初作時。磨水服。○刀斧傷血漏。刮末敷患處。卽止血止痛。○蛔蟲疳積。磨水服。蟲卽吐出。○難產。磨水服。○頭瘡癢爛。臘梨切碎此果。以油煎之。乘熱徧擦。向火取暖。隨以布向火取熱。覆病人身上而睡。又以被蓋。不見生風。卽愈。○潮熱。磨水服。漸減而愈。

諸穀部

沙米

延綏鎮志。苗莖如麻。葉類艾而稍圓。有刺。高尺許。生子成房。粒細如黍。杵去皮。用羊羹作食。服之不飢。邊外名黍喇棘。○瀚海記。沙蓬米。凡沙地皆有之。鄂爾多斯所產尤多。枝葉叢生如蓬。米似胡麻而小。性暖。益脾胃。易於消化。好吐者多食。有益。作爲粥。滑膩可食。或屑之。可充餅餌茶食之需。○人海記。張家口內保安沙城一帶地產沙蓬。實如蒺藜。中有米如稗子。食之益人。○藥性考云。蓬蒿之實。名曰沙米。清熱消風。饑荒食旨。味甘性溫。通利大腸。消宿食。治噎隔反胃。服之不飢。

西國米

珠兒粉
竹米

嶺南雜記出西洋西國。煮不化。而色紫柔滑者真。僞者以葛粉爲之。○通雅。今南楚兩粵專採葛根作粉食。其粉可作丸。曰葛粉丸。廣人以假西國米。能醒酒。○朱排山柑園小識。西國米來自閩廣洋艘。大如綠豆。以色紫煮不化者真。健脾運胃功最捷。久病虛乏者。煮粥食最宜。

益胃和脾。病起宜食。

珠兒粉

洋舶帶來。粵澳門杭寧波乍浦通舶市者皆有。形絕細。如蘇子。勻圓而白。云係外洋人採葛根及薇箕根。或茹粉所造。煮之須滾水沖泡。粒粒分明如魚子樣。極柔滑。以糖霜和食。或淡食。氣清香。味甘滑。明目。運脾開胃。解酒生津。久服尤能強腎。

東西洋考。大泥。卽古淳泥。今隸暹羅。土產有西國米。亦名沙孤米。其樹名沙孤。身如蕉空心。取其裏皮削之。以水搗過。舂以爲粉。細者爲王米。最精。粗者民家食之。以此代穀。今賈舶慮爲波濤所溼。只攜其粉歸。自和爲丸。○庚申十月。予在陳夔友家。見有胡西菽。盛以玻璃小筆管瓶內。菽白而細。與珠兒粉無別。云得自王撫軍署。可入藥。大能消痰。其甥女一夕患肺風痰喘。危極。兒醫多言不救。用此一錢。調

竹米

物理小識。竹結實。斑文兩兩相比。謂之竹米。

下積如神。

陳倉米。朱公米。

嶺南記。武昌漢陽門內。舊爲陳友諒倉基。甲子年。有掘得黑米者。色如漆。堅如石。炒之卽鬆。○秋燈叢話。康熙甲子。武昌郡廣福坊。掘得黑米數十斛。堅如石。炒研爲末。治膈症如神。傳爲僞陳友諒積粟所。又天門學宮前。明改建北郭倉基地。亦掘得黑米。治疾頗驗。乾隆丙申。黃州重修郡學。疏濬泮池。池底積粟甚夥。色如漆而堅。治病效如前。人爭取之。太守王公廷棟。恐係前人鎮壓物。禁而掩之。敏按。西陽雜俎。乾陔國尸毗王倉庫。昔爲火所燒。其中粳米。燠者。於今尙存。服一粒。永不患瘡。炒研。治膈症如神。不藥良方。陳年倉米。治卒心痛。燒灰和蜜服之。卽止。

朱公米

南中紀聞。靖州南二十里飛山砦。相傳爲元末朱都督屯兵之所。牆礮時有米粒。色微黑而不腐。云是朱公所遺兵糧。游客謁神祠。取輒得之。至今尙存。

療脾疾。

山穀

宦游筆記。出塞外。土人名烏爾格納。莖長尺餘。細如草。節如竹。葉亦如竹。每二節一葉。秀穗類蓼花。結粒似穀而色紅。採之曬乾。去其皮。煮粥。粥如穀香。蒙古用以充饑。兼碎麵合茶。商民均雜粟食之。色紅。豔可愛。而味與穀無辨。故名之曰山穀。實生於水濱或山溝爾。

味甘香。行氣利水。清大小腸火。亦補脾胃。

根。蒙古人名墨克爾。外皮微細。內實粉白。味甘美。蒙古生啖。商民合肉熬食。秋冬之際。蒙古搜掘鼠穴。得食物盈筐。內多此物。長二三寸。俱野鼠嚙截運藏者。

味甘生津。滋潤血脈。調營衛利水。

青稞黃稞

藥性考。青稞黃稞。仁露於外。川陝滇黔多種之。味鹹。可釀糟弔酒。形同大麥。皮薄麵肥。西南夷人倚爲正食。

下氣寬中。壯筋益力。性平涼。除溼。發汗。止洩。多食脫髮。損顏色。

米油

此乃滾粥鍋內煎起沫。灑滑如膏油者是也。其力能實毛竅。最肥人。用大鍋能煮五升米以上者。其油

良。越醫全丹若云。黑瘦者食之。百日即肥白。以其滋陰之功。勝於熟地也。每日能撒出一盃。淡服最佳。若近人以熟粥。統汁爲米油。未免力薄矣。

味甘性平。滋陰長力。肥五臟百竅。利小便通淋。

精清不孕。紫林單方。用煮米粥。滾鍋中。面上米沫浮面者。取起加煉過。食鹽少許。空心服下。其精自濃。即孕矣。

鍋焦

陳久年糕

一名黃金粉。乃人家煮飯鍋底焦也。取僧寺中米多焦厚者入藥。良。

味苦甘。性平。補氣運脾。消食止泄瀉。八珍粉用之。

鍋焦丸。小兒常用。健脾消食。家寶方。用鍋焦炒黃三觔。神麴炒四兩。砂仁炒二兩。山楂四兩。蒸蓮肉去心四兩。雞肫皮一兩。炒共爲細末。加白糖米粉和勻。焙作餅用。

老幼脾瀉久不愈。梁侯瀛集驗方。鍋焦爲末四兩。蓮肉去心淨末四兩。白糖四兩。共和勻。每服三五匙。日三次。食遠下。

白瀉不止。種福堂方。乾飯鍋粑二兩。松花二兩。炒臘肉骨頭五錢。烘脆。共爲末。砂糖調。不拘時服。脾胃不健。祝氏效方。鍋焦二觔。蓮肉一觔。白糖半觔。蜜一觔。丸如桐子大。每服數十丸。空心白湯下。

玉露霜。治老人脾泄最效。白朮炒二兩。陳皮一兩五錢。蓮肉去心四兩。薏苡仁四兩。炒糯米一升。炒菘豆一升。炒熟。陳米鍋粬一升。炒。糖霜量加。共爲末。每用二三錢。滾水調勻服之。行篋檢秘

預稀痘疹。不藥良方。銀花金者不用陰乾。鍋粬每一升。入銀花一兩。共研末。用洋糖或做糕餅。或開水調和。每日令小兒食之。

陳久年糕

燒灰治痢。

阿迷酒

出東洋。氣味香冽。頗醲厚。每服不過半盞。大能助元氣。驟長精神。估舶帶來。凡督撫大員。輒多備貯。爲不時之需。或遇要事疲憊。一滴入口。精神百倍。較鴉片尤速。○物理小識。吉利重耐。以紅花苧胡桃入麴釀者。醫洩數效。

味甘辛。竄達。能捷通百脈。益元生氣。每日少飲一二滴。理怯如神。

酒釀

俗名酒窩。又名浮蛆。乃未放出酒之米醇也。味醲厚。多飲致腹瀉。性善升透。凡火上行者忌之。味甘辛。性溫。佐藥發痘漿。行血益髓。脈生津液。

赤眼淹纏。祝氏效方。杜仲、厚朴、桑白皮、檳榔各一錢。取雄雞肝一個。忌見水。去紅筋。入白酒釀六兩。隔湯蒸熟。去渣。以湯肝食下。隔二日再服一次。全愈。

小兒鼻風吹乳腫痛。劉起堂經驗方。用酒釀和菊花葉敷上。立愈。無葉用根。甘菊葉尤佳。搗汁沖和服。更效。

吹乳方。周氏家寶。用苧麻根嫩者。炒。和白酒釀少許。共搗爛敷患處。一日夜即消。忌食發物。

頭風。用蒼耳子、白芷、穀精草各五錢。川芎三錢。甜酒釀四兩。老酒二盃。煎一盃服。炒淨方。

夢遺白濁。酸梅草二錢。孩兒菊二錢。搗取汁。加不見水酒釀。空心量服。救世青囊。

難產。用酒釀麻油。蜂蜜。童便。雞子白。各半盞。煎溫服。即下。

痘出不起。不藥良方。用狗蠅七枚。冬日取蠅。在狗耳內。搗爛。和酒釀服。即日發起。紅潤可觀。

痘瘡不起。良方集要。荸薺搗汁。和白酒釀。頓溫服之。但不可頓大熱。大熱則反不妙。慎之。

保元丹。千金不易方。此丹張氏家傳。已五世矣。黃精一觔。甘枸杞四兩。酒釀五觔。好黃酒五觔。入罐。煮一炷香。每飲一茶杯。藥渣搗爲丸。加胡桃肉八兩。大黑棗八兩。青州柿餅一觔。

酒蕈

生酒罈中。不恆有。凡藏酒之家。千百罈酒。間有一罈。啓之中空無酒。下有蕈結於中。其蕈初結之時。酒

上薄凝如衣膜。久則漸厚。一二寸。便能滲酒。將酒中精華醇釀之氣。盡攝於膜內。膜乃漸厚。酒亦漸少。久久則酒乾。所存十不餘一。啓視之。其膜如鮮海蜇。濡潤而軟。嗅之作酒香。微帶麴蒸氣。識者取之焙乾。乾者如瓜皮。面青黑。背作肉紅色。溼軟如棉。可入藥。蓋酒能生蕈。必罈係新出罈。未脫火氣。而置酒之地。又爲溼熱所蒸。致中變而成此。故造釀家用罈。貴舊而不貴新也。金御乘自慈谿歸。帶有酒蕈。出以相示。云彼土亦罕得。間有之。然不多見也。

治一切酒傷酒勞酒疽。因酒成病諸症。服之立效。

神黃豆 細豆 回回豆 青花豆 眞甯豆

池北偶譚。產滇之南。徼西南夷中。形如槐角子。視常豆稍巨。用筒瓦火焙。去其黑殼。碾末。白水下之。可永除小兒痘毒。服法。以每月初二日十六日爲期。半歲每服半粒。一歲每服一粒。一歲半每服一粒半。遞至三歲服三粒。則終身不出矣。或曰。按二十四氣服之。以二十四粒爲度。或云。水畢閉日服之。○珍異藥品云。出雲南近西地方。痘將發未發時。用神黃豆連殼焙炒燥。用豆研細水服。○本經逢原云。神黃豆產緬甸。形如槐子。近時稀痘方用之。一陽日用清水磨服。○痘學眞傳云。神黃豆出雲南。能稀痘。生熟各一粒。甘草湯咀服。○寧陽張琰種痘新書云。凡痘自胸以上自臍以下俱有。而中間一截全無者。名兩頭痘。此氣血不能貫通上下。而腰臍之間爲寒毒凝滯也。若不急治。七日之後。必變灰白之症。

矣。見點時。急用生芪。當歸。赤芍。桔梗。防風。荊芥。厚朴。續斷。白芷。山楂。木通。神黃豆三十粒。服此中間方有痘。乃可無虞。

南詔備考。普洱府及永昌府皆出神黃豆。能稀痘。青花豆可治瘡。有客帶滇產神黃豆來。其形如細竹筒。長可三四寸。搖之有聲。其中如竹節。片片相疊。剖出如棋子樣。白色包裹。中含一豆。黃色光亮。形如瓠子。中有線痕。堅實而扁。服之解痘毒。

按神黃豆有二種。百草鏡云。出雲南普洱府。又四川亦產。莢如連翹略短。內有豆。微紅色。產雲南者。形如槐角子。比蠶豆略大。瓦上焙乾。去外黑殼。用二種形狀不同。係地上所產各別。然其稀痘解毒之性。則一也。○寶笈方。痘將出時。用神黃豆。按一歲一粒。剝去外殼。并內皮。將瓦焙熟一半。留生一半。芫荽湯調服。毒重者稀。毒輕者更稀。十餘歲者。亦不過七粒。倘未出痘者。亦如法以水調服之。竟不出痘。宜三月三。五月五。七月七。九月九等日。

緬豆

滇略。緬豆如豆。蔓生。子大如栗。斑文點點。咀之傅惡瘡。良。然性迅惡。誤服之。吐瀉致死。五雜俎云。滇中有神黃豆。似五倍子。能令兒童稀痘。然亦不甚驗也。

回回豆

五雜俎云。出西域。狀如椿子。磨入麵中。極香。能解麵毒。

青花豆

宦遊筆記。雲南永昌府。有青花豆。出於外地。夷人帶來易貨者。治瘡。

真寧豆

出陝西慶陽真寧地。味甘平。能解諸藥毒。

稽豆

附葉

逢原云。細黑豆。一名稽豆。俗名料豆。今人以飼馬。故俗又呼馬料豆。○杭州府志。黑豆之細者曰稽豆。細而扁者曰零烏豆。俗名馬料豆。可肥馬。○從新云。黑大豆之小者爲馬料豆。不知料豆雖小而形長微扁。與黑豆形迥別。當另是一種。綱目稽豆下。僅載其能去賊風風痹。治婦人產後冷血而已。其他一切功用。全未之及。今爲補之。

味甘溫無毒。壯筋骨。止盜汗。補腎。活血。明目。益精。入腎經血分。同青鹽。旱蓮草。何首烏。蒸熟。但食黑豆。則鬚髮不白。其補腎之功可知。今人以製何首烏。取以引入腎經也。炒焦淋酒。治頭風腳氣。以其直達腎經血分。煮汁服。解烏附丹石藥毒。

藥性考。本經黑大豆。卽今之馬料豆也。其色黑。而形如人腰。故入腎經。益水明目。多服令人身重。一年

後復原。久服身輕。非花豆中之黑大豆也。凡服豆忌蕪麻子。厚朴。豬肉。歌云。黑大豆甘。腰子樣式。所以補腎。藥餌宜入。卽是馬料。煮寒炒熱。調中下氣。止痢。擘急。利水除脹。追風活血。生研敷腫。吞止煩渴。解一切毒。甘草煎汁。傷中淋露。產後諸疾。明目悅顏。製服有益。○又云。稽豆卽小黑豆。因其粒細。稱驢豆。別馬料也。治產後血風冷痛。其粒細不及馬料。歌云。稽豆黑小。甘逐邪風。冷痺血滯。浸酒和融。○雨箕翁食記。小黑豆入鹽煮。久食。大能補腎。○事親述見。稽豆補五臟益中。助十二經脈。調中。煖腸胃。殺鬼氣。舒筋。○紫虛子吞豆法。黑料豆淘淨曬乾。以淨瓶裝之。初服每日一粒。以白湯生吞之。次日吞二粒。每日加一粒。至百日吞百粒。從此每日吞百粒。但初起服之。腸胃未剛。每遇大便。須看豆化不化。如豆化。則漸加。倘未化。仍照舊勿加。必待食之能化。然後遞加。至百粒爲度。服之能益精補髓。壯力潤肌。髮白復黑。久則轉老爲少。終其身無痰病也。

救生苦海。有嫦娥奔月方。與紫虛吞豆法同。但其法按太陰盈虧之數。初一日吞一粒。逐日加一粒。至望日十五粒而止。十六日又逐日減一粒。至晦日一粒而止。月初則又加起。與紫虛之法微有不同。并附以備用。

煮料豆方。明太醫劉浴德有增補內經拾遺四卷。其種子論後。載有煮料豆藥方云。老人服之。能烏鬚黑髮。固齒明目。當歸四錢。川芎。甘草。廣皮。白朮。白芍。丹皮。菊花。各一錢。杜仲炒。黃芪各二錢。牛膝。生

地熟地各四錢。青鹽六錢。首烏。枸杞子各八錢。同馬料豆煮透曬乾。去藥服豆。○又義復方。馬料豆五升。桑椹半觔。枸杞子四兩。肉蓯蓉半觔。竹刀切去筋。青鹽龍骨各二兩。同豆煮熟。和藥同曬乾。貯罐用。常食大有補益。○又方。呂逸儒傳方。何首烏一觔。用馬料豆汁煮。或老酒亦可。要九蒸九曬。枸杞一觔。酒蒸。用乾藥末搗勻曬。馬料豆一斗。再用料豆五升煮汁。以汁煮豆曬乾。九蒸九曬。或用好酒煮亦可。菟絲子一觔。酒煮曬焙。補骨脂一觔。酒洗焙。真川椒四兩。曬烘。青鹽二兩。川牛膝一觔。酒煮焙。煉蜜爲丸服之。○又方。何首烏二觔。青鹽一兩。棗仁。杜仲。枸杞各二兩。遠志。小茴香。陳皮各一兩。肉蓯蓉。苡仁。香附。白茯苓。川芎各二兩。五味子。牛膝。補骨脂。木瓜各一兩。五錢。歸身三兩。肉桂五錢。防己一兩。二錢。甘草八錢。小黑豆一斗。用水煎藥數十滾。瀝出渣。以藥汁煮豆。汁盡爲度。曬乾。每服百粒。開水下。

延齡廣嗣仙方。懷生地酒製。何首烏酒煮。旱蓮草。鹿銜草。真者絕少。用仙靈脾代之。以上各三兩。按四時。乾山藥乳拌。白茯苓乳拌。當歸身酒炒。真青鹽。以上各一兩。按分至。石菖蒲。菟絲子。肉蓯蓉酒浸去膜。補骨脂。五加皮。骨碎補。淮牛膝。白甘菊。原杜仲。酒炒斷絲。枸杞子。蛇牀子。槐角子。金櫻子。覆盆子。川黃連。建澤瀉。以上各五錢。按十六節。以上二十四味。俱合二十四氣。除去青鹽。鍋內煎汁至半。瀝渣。再將渣煎過半。瀝清。沖和煎濃。入馬料豆三升七合。女貞子一升七合。按陰陽二氣。二至二分。合年月日時。週天度數。餘一合半。以雀閏。煮數十滾。將青鹽研細。傾入同煎。以汁盡爲度。取豆曬乾。收貯磁瓶。

每晨四錢。滾湯送下。如遇出門飢餓。即可嚼食代點。此豆謹按陰陽二十四氣。合週天度數。製法得中和補益之妙。久服能令人鬚髮再黑。齒落更生。耳目聰明。手足便利。壯陽補腎。固本還元。多育子息。多增年壽。常服不斷。可成地仙。凡腎虛目暗。上盛下虛者。尤爲切合。

四寶大神丹。家寶方能治五勞七傷。服藥後忌腥臭發物房事。馬料豆五升。用混堂油製九次。黃芪八兩。人乳製七次。白當歸酒洗四兩。金櫻子二斗。去內子與毛。外去刺。淘淨熬膏。臨收時加童便一二盞聽用。右將前三味和金櫻膏。丸如梧子大。每服三錢。桂圓湯下。

明目衄腎兼治筋骨疼痛。○不藥良方。小紅棗十二枚。冷水洗淨去蒂。甘州枸杞子三錢。小馬料豆四錢。水二盃。煎一盃。早晨空心連湯共食之。

絕瘡。製首烏剩下黑料豆。可以絕瘡。凡四日兩頭瘡。用豆煎湯服卽愈。○截三日瘡。祝穆效方。常山。雲苓。官桂。甘草。檳榔。各三錢。小黑豆四十九粒。酒水各二盃。慢火煎二盃。當晚先服一盃。蓋暖而睡。留一盃。至次日須將發前早兩個時辰服。要熱服蓋暖。臥待瘡至。至亦輕鬆。亦有當日而愈。愈後忌房事。戒食生冷勞碌風霜。忌食雞羊牛蛋白扁豆半月。永截不發。○又祕方集驗。治瘡。檳榔。蘿蔔子。常山。甘草。各一錢。紅棗四枚。烏梅七枚。馬料豆每歲一粒。水二盃。煎一盃服。忌三日葷油。永不再發。痰喘氣急。同壽錄。用梨剗空。中心納小黑豆令滿。留蓋合住紮緊。糠火煨熟。搗作餅。每日食之。

中風口噤。文堂集驗方。馬料豆一升。煮濃汁如飴。含汁在口。卽能言也。

黑白丸。治痞積。開胃消食。健脾補腎。○百草鏡方。馬料豆。白蒺藜去刺。各一觔。炒磨末。蜜丸。梧子大。每服二三錢。開水送下。

治陰症手足紫黑。集驗方。黑料豆三合。炒熟。好酒烹滾。熱服。加葱鬚同烹。更妙。

盜汗。文堂集驗方。蓮子七粒。黑棗七枚。浮麥。馬料豆各一合。水煎服。三次愈。

腎虛腰痛。并治陰虧目昏。活人書。用腰式烏豇豆。馬料豆各一兩。煮湯。入鹽少許。五更時乘熱服。忌鐵器。

陰虧目昏。老眼失明。活人書。馬料豆。甘枸杞。女貞子各十兩。陰虧目昏。除女貞子。爲末。煉蜜丸。梧子大。早晚服二三錢。自效。

赤白帶下。白果去皮。煮熟。蜜餞。每日清晨喫七枚。再食炒馬料豆一兩。白滾水送下。數日愈。

妊娠腰痛酸軟。產家要覽。馬料黑豆二合。炒焦熟。白酒一大盃。煎至七分。空心下。

治產後中風口噤目瞠。角弓反張。姚希周集驗。用黑料豆。鍋內炒極焦。沖入熱黃酒內服之。立效。再服回生丹。全愈。

華真君三豆湯稀痘。楊春淮驗方。菉豆。赤飯豆。馬料豆等分。每日煮湯與小兒喫。出痘自稀。如遇痘

毒亦用此湯飲之。搗搽敷上。其毒自消。

痘風爛眼。集驗云。風爛眼用醃白梅一個。去核。入綠礬少許。川椒三十粒。以五銖錢二個夾之。用芋麻紮住。無根水浸洗自愈。若出痘得此症。再加馬料豆一歲一粒。投水中。

眼藥丸方。周氏家寶。用馬料豆一升。炒蟬蛻四兩。酒洗去頭足。木賊草四兩。去節。菟絲子一觔。炒。甘菊花四兩。曬乾。白蒺藜一觔。各爲末。水法爲丸。每服二三錢。晚服。滾湯下。如若年高。桂圓湯下。

各種癬。陳別駕彬。曾任太醫院官。有治各種癬方。用馬料豆。以瓦罐。不拘多少。裝入罐內。罐口以銅絲罩格定。使豆不能倒出。然後用大高邊火盆一個。盆鑿一孔。將罐倒合孔上。四圍以乾馬糞壅之。火燃罐底。盆底下用磚墊空。安盃一個。接油。上火煨。罐內豆自焦。有油從盆底滴入盃中。色如膠漆。以此搽癬。三次即愈。

解藥毒。凡服藥過多。以致頭面浮腫。脣裂流血。或心腹飽悶。臍下撮痛者。用馬料豆。菘豆各四兩。合煎汁。連豆服。病好爲度。

中附子川烏天雄斑蝥毒。不藥良方。馬料豆煎汁服之。即解。

鴉豆葉治瘤。急救方。頸後粉瘤。馬料豆葉。辟麝香草。同搗敷患處。其瘤漸軟漸消。破則手擠去粉。疙瘡不破。聽其自消。

蠶豆殼

治癩疔。行篋檢祕。用油鹽蠶豆殼一鍾。麻油浸一週時。取起。將豆殼瓦上焙研爲末。麻油調搽患處。立愈。

膈食。指南云。用蠶豆磨粉。紅糖調食。數次即愈。

小便日久不通。難忍欲死。慈航活人書。蠶豆殼三兩煎湯服之。如無鮮殼。取乾殼代之。

黃水溜瘡。毛世洪經驗集云。凡大人小兒頭面黃水瘡。流到即生。蔓延無休者。用蠶豆殼炒成炭。研細。加東丹少許。和勻。以真菜油調塗。頻以油潤之。三日即愈。

治漏。種福堂方。用炒熟蠶豆殼磨末。每服三四錢。加沙糖少許。調服。

癢瘡。張卿子外科祕方。用鮮蠶豆搗如泥。塗瘡上。乾即換之。三五次即愈。如無鮮者。用乾豆。以水泡胖。搗敷亦效。

吐血。張卿子方。以新蠶豆殼四五年陳者妙。煎湯飲之。即愈。

天泡瘡。蠶豆黑殼。燒灰存性。研末。加枯礬少許。菜油調敷一次。即愈。

藥性考云。蠶豆苗。能醒酒。

醬油

以麩豆拌罨成黃。鹽水漬成之。伏造者味厚。秋油則味薄。陳久者入藥良。味鹹性冷。殺一切魚肉菜蔬毒。塗湯火傷。多食發嗽作渴。

解食荔作脹。以陳年醬油飲少許。即消。

中輕粉毒。以三年陳醬油化水頻漱之。集簡方

糟油

藥性考。摩風癢腰膝痛。開胃暖臟。止嘔噦。解蔬菜毒。

腐漿沫渣皮乳
鍋巴泔水 麻腐

瀕湖綱目於豆腐集解。註腐皮堪入饌。而漿乳皆遺之。又胡麻亦可作腐。綱目胡麻條亦遺之。今悉爲

補概名曰腐。

腐漿。味甘微鹹。性平。清咽祛膩。解鹽滷毒。藥性考云。味甘微苦。性涼。清熱下氣。利便通腸。能止淋

濁。銀杏研漿。

傷寒十日不汗。張卿子妙方。用未點豆腐漿一大盃。調好白蜜熱服。即出汗愈。神效。

腳氣腫痛難走者。熱豆腐漿加松香末搗勻敷。過夜即好行走。永無後患。

大便下血。古今良方。葶薺一觔或半觔。豆腐漿不沖水者一大盃。將腐漿頓極熱。搗葶薺汁。乘熱沖

入飲之。

鹽哮。救生苦海。用豆腐漿點糖少許。日日早服一盃。不間斷。過百日自愈。

治黃疸。劉羽儀驗方。每日空心冷喫生豆腐漿一盃。喫四五次自愈。忌食生蘿蔔。

痰火吼喘。經驗廣集。飴糖二兩。豆腐漿一盃。煮化頓服愈。

治勞及自汗。回生集方。用黑豆淘淨。磨成腐漿。鍋內熬熟。結成皮。每食一張。用熱黑豆漿送下。即效。

○凡人每日清晨喫黑豆腐漿。大有補益。可以免癆病之患。

肺癰肺痿。用芥菜瀟陳年者。每日將半酒杯沖豆腐漿服。服後胸中一塊必塞上塞下。塞至數次。方

能吐出惡膿。日服至愈。

血崩。不藥良方。生豆腐漿一盃。生韭菜汁半盃。入漿內。空心服一二次。

五妙湯治產後并弱症。郁文虎傳方。用頭鍋腐漿一盃。腐皮一張。生雞蛋一個。打碎。沖入漿內。再加

圓眼肉十四枚。白糖一兩。入漿內滾服。五更空心食。

陳廷慶云。豆腐漿入陰分。瀉火通淋濁。凡淋症用六一散沖腐漿食。最妙。五更沖雞蛋白糖點服。寧嗽

補血。粵人以腐漿煮粥食。名甜漿粥。大能補虛羸。

腐沫。即豆腐泔水上結沫是也。治鵝掌癬。生手掌及足掌。層層剝皮。血肉外露。此沫熱洗即愈。

腐渣。此造豆腐所剩之渣。人以飼豬。入藥須用生腐渣。

治一切惡瘡。無名腫毒。神效。不藥良方。用豆腐渣在砂鍋內焙熟。看紅腫處大小。量作餅子貼上。冷即更換。以愈爲度。

大便下血。古今良方。用不見水豆腐渣炒黃。清茶調服。即愈。

治臙瘡。裙邊瘡。爛臭起沿。養素園方。生豆腐渣捏成餅。如瘡大小。先用清茶洗淨。絹帛拭乾。然後貼上。以帛纏之。一日一換。其瘡漸小。肉漸平。此費啓彰親試有效之方也。又可敷腳蛙。

腳上皮膚生水孔。而皮溼爛者。不藥良方。豆腐渣貼三日。即愈。不要落生水。

腸風下血。慈航活人書。雪花菜。即豆腐渣。用未曾瀘出漿者。帶水鍋內炒燥。爲末。每服三錢。紫血塊者。白糖湯下。紅血塊者。砂糖湯下。日三次。雖遠年垂危者。服之神效。

腐皮。味甘性平。養胃滑胎解毒。

小兒遍身起羅網蜘蛛瘡。燥癢難忍。仁惠編。用豆腐皮燒存性。香油調搽。自愈。

落頭疽。慈惠小編。用壁上蟪子五六隻。腐皮包好。喫完即愈。

冷嗽。劉羽儀驗方。乾豆腐衣。燒灰存性。爲末。熱陳酒調下。喫四五十張即愈。

水臃脹。種福堂方。陳芭蕉扇去筋。燒灰存性。五分。千金子去油殼。二分。五釐。滑石二分。共爲細末。以

腐衣包。滾水送下。十服愈。

腐乳。一名菽乳。以豆腐醃過。加酒糟或醬製者。味鹹甘。性平。養胃調中。

腐巴。此卽腐漿鍋底所結焦巴也。入藥曬焙研末。或生搗作丸。皆可用。藥性考名鍋茨。開胃消滯逐積。

治淋濁補血。慈航活人書有五效丸。用豆腐鍋巴一兩。加川連一錢。同搗丸如桐子大。每服五錢。赤

帶。蜜糖滾水吞下。白帶。砂糖湯下。熱淋尿血。白湯下。腸風下血。陳酒下。血風瘡。先將豆腐泔浸洗去

靨。以布拭乾。用前末藥。卽川連腐巴粉末。丸時留一半。真麻油調搽。乾則再塗。三四次自愈。

翻胃。神方珍記。用豆腐鍋巴。黃色者佳。炒研末。每服三錢。沙糖湯調服。白湯下。

痢疾。神方珍記。陳冬米炒豆腐鍋巴二味。各等分。爲細末。空心白湯調服。二三錢。服後宜餓半日。自

愈。

腐泔。卽豆腐所瀝下之水也。藥性考云。豆腐有鹽滷點者。有石膏點者。俱能清熱。

性清涼。能通便下痰。通癰閉。洗衣去垢膩。

麻腐。乃胡麻小粉所造者。味甘性平。潤肌滑腸。

解毒。蔣儀藥鏡滋生賦云。麻腐豆粉。清腸清胃。

芝麻殼

此乃脂麻外殼也。綱目載其苗曰青蕘。又有麻枯餅、麻花、麻稽、無麻殼。因補之。湯火傷。楊春涯驗方。芝麻殼燒存性。研細。遇火傷者。用麻油調搽即愈。倘溼爛。乾搽之。半身不遂。千金不易方。芝麻殼五錢。酒煎服出汗即愈。

諸蔬部

甘藷
梗粉
甘藷酒

一作甘藷。又名朱薯。以其皮有紅者也。一名金薯。今俗通呼爲番薯。或作番茹。有紅皮白皮二色。紅皮者心黃而味甜。白皮者心白而味淡。南方各省俱植之。沿海及島中居民。以此代穀。其入藥之功用亦廣。而諸家本草皆未載。李瀕湖特補列綱目中。惜其所言者。惟補虛乏。益氣力。健脾胃。強腎陰而已。他皆未之及焉。乾隆五十一年冬。今上特允閣學侍郎張若淳之請。勅直省廣勸栽植甘藷。以爲救荒之備。陸中丞燿有甘藷錄之輯。所載衛生一門。實足補李氏所未及。因擇錄之。以補其遺。陸公原序云。甘藷。卽薯蕷之屬。見於陳旂異物志。稽含南方草木狀。中土之有此物。其來舊矣。第不甚貴重。栽植者少。明季有閩人陳經綸。復自呂宋移其種歸。巡撫金公學曾勸民樹藝。閩人德之。號爲金薯。然自是長樂。謝肇淅。黃州李時珍。新城王象晉。各有論述。皆不及經綸事。而其裔孫世元父子。復爲金薯傳習錄。

盛侈其先世傳自呂宋之功。一似中國素非所產者。此考證之疎也。夫以一物之微。足以備荒療疾。而又不費功力。其爲功於民食。實不淺尠。前任布政使李公渭。嘗舉以教山東之民。其性又喜沙土高地。於山海之區。尤屬相宜。五雜俎。百穀之外。有可以當穀者。芋也。薯蕷也。而閩中有番薯。似山藥。而肥白過之。種沙地易生。而極蕃衍。饑饉之民。多賴全活。此物北方亦可種也。羣芳譜。朱薯一名番薯。大者名玉枕薯。形圓而長。本末皆銳。皮紫肉白。質理膩潤。與芋及薯蕷自有各種氣香。生時似桂花。熟者似薔薇露。撲地纏生。一莖蔓延數十百莖。節節生根。一畝種數十石。勝種穀二十倍。閩廣人以當米穀。有謂性冷者。非二三月及七八月俱可種。但卵有大小耳。卵八九月始生。冬至乃止。生便可食。若未大者。勿頓掘。令居土中。日漸大。到冬至須盡掘出。不則敗爛。金氏學會曰。薯傳外番。因名番薯。形如王瓜藕臂。如拳如指。如卵如棗。大小不一。實同種別。皮有紫有白。有深淺紅。有濃淡黃。肉亦如之。蒸熟勻膩如脂。甘平益胃。性同薯蕷。海隅人以供饕殮。蔓延極速。節節有根入地。卽結。每畝可得數千觔。勝種五穀幾倍。徐氏元扈曰。昔人謂薯蕷有六利。柿有七絕。予謂甘薯有十二勝。收入多。一也。白色味甘。諸土種中特爲覓絕。二也。益人與薯蕷同功。三也。徧地傳生。剪莖作種。今歲一莖。次年便可種數十畝。四也。枝葉附地。隨節生根。風雨不能侵損。五也。可當米。凶歲不能災。六也。可充籩實。七也。可釀酒。八也。乾久收藏。屑之旋作餅餌。勝用錫蜜。九也。生熟皆可食。十也。用地少。易於灌溉。十一也。春夏下種。初冬收入。枝葉

極盛。草穢不容。但須壅培。不用鋤耘。不妨農。十二也。陸公薯錄有溉種藏製諸法。雖無關於藥病。而有濟於備荒。故併錄之。種薯宜高地沙地。起脊尺餘。種在脊上。遇旱可汲井澆灌。即遇澇年。若水退在七月中。氣候既不及藝五穀。即可剪藤種薯。至於蝗蝻爲害。草禾蕩盡。惟薯根在地。薦食不及。縱令莖葉皆盡。尙能發生。若蝗信到時。急令人發土。徧壅。蝗去之後。滋生更易。是天災物害。皆不能爲之損。人家凡有隙地。但只數尺。仰見天日。便可種得石許。此救荒第一義也。歲前深耕。以大糞壅之。春分後下種。若地非沙土。先用柴灰或牛馬糞和土中。使土脈散緩。與沙土同。可行根。重耕起要極深。將薯根每段截三四寸長。覆土深半寸許。每株相去縱七八尺。橫二三尺。俟蔓生既盛。苗長一丈。留二尺作老根。餘剪三葉爲一段。插入土中。每栽苗相去一尺。大約二分入土。一分在外。即又生薯。隨長隨剪。隨種隨生。蔓延與原種者不異。凡栽薯須順栽。若倒栽則不生。節在土上則生枝。在土下則生卵。約各節生根。即從其連綴處斷之。令各成根苗。每節可得卵三五枚。凡藤蔓已遍地不能容者。即爲游藤。宜翦去之。及掘根時。捲去。藤蔓俱可飼牛羊豕。或曬乾冬月喂。皆能令肥脂。二三月種者。每株用地方二步有半。而卵徧焉。每官畝約用薯三十六株。四五月種者。地方二步。而卵徧焉。畝約六十株。六月種者。地方一步有半。而卵徧焉。約一百六株有奇。七月種者。地方三尺以內。得卵細小矣。畝約九百六十株。種種疎密。略以此準之。九月畦種。生卵如箸如棗。擬作種。此松江法也。金氏曰。薯苗入地即活。東西南北。無地不

宜得沙土高地。結尤多。天時旱澇。俱能有秋。養苗地宜鬆。耕過須起町。高四五寸。春分後。取薯種科置町內。發土薄蓋。縱橫相去尺許。半月即發芽。日漸蔓延。長一丈或五六尺。割七八寸爲一莖。勿割盡。留半寸許。當割處復發生不息。若養蔓作苗。須用稍長尺許。密密栽豎。如養葱蒜法。栽莖使牛耕町。寬二尺許。高五六寸。將莖斜插町心。約以七分在町內。三分在町外。町內者結實。町外者滋蔓。每莖相去一尺餘。十餘日。町兩旁使牛耕開令曬。又七八日。以糞壅之。仍使牛培土。每町可得薯三四觔。若雨多。須將蔓撥町上。毋令浮根匝地。然實結地內。蟲不能災。葉如食盡。亦能復發。早栽宜稀。晚栽宜密。三四月栽者。實粗大。七八月栽者。實細小。秋末實始加大。冬至前當掘盡。不掘盡。亦不能大。熟時須先割蔓。置町下。俟乾捲起。冬月剉喂牲畜。若北地早寒。則遲一個月栽。早一個月掘。宜遲宜早。亦看天氣寒暖耳。甘薯疏云。江南田汙下者不宜薯。若高仰之地。平時種藍種豆者。易以種薯。有數倍之獲。大江以北。土更高。地更廣。即其利百倍不啻矣。倘慮天旱。則此種畝收十石。數口之家。止種一畝。縱旱甚。而汲井灌溉。一至成熟。終歲足食。又何不可。取種之法。羣芳譜云。九月十月間掘薯卵。近根先生者。勿令損傷。用輦草包裹。掛通風處陰乾。一法於八月中揀近根老藤。剪七八寸長。每七八根作一小束。耕地作畦。將藤束栽如栽韭法。過月餘。每條下生小卵如蒜頭狀。冬月畏寒。稍用草蓋覆。至來春分種。一法霜降前。取近根卵稍堅實者。陰乾。以輦草作襯。另以輦草裹之。置無風和暖不近霜雪不受冰凍處。一法霜

降前收取根藤曬令乾於竈下掘窖約深一尺五六寸先用稻糠三四寸次置種其上更加稻糠三四寸以土蓋之一法七八月取老藤種入木筩或磁瓦器中至霜降前置草筩中以稻糠襯置向陽近火處至春分後依前法種金氏曰存薯之法不一在人變通或存木斛草圍瓷甕竹籠中俱可但性畏寒又畏熱置避風和暖處用草浮蓋俾通氣若封固則發熱壞爛敏前在東甌玉環見其島民少穀食多以茹爲糧彼土有地率多種茹土人云其利十倍於穀以茹糧多者爲富其收茹之法多曝乾切條以竹席圍如囤儲之久亦不蛀用則以水煮代飯云食之多力鮮病蓋其味甘能補脾土故也金氏曰薯初結即可食味淡多汁及時則甜煨食煮食燂食亦可生食切片曬乾碾作饘粥磨作粉餌滾水灼可作丸拌麪可作酒春細水瀘去渣澄曬成粉其葉可作蔬○范咸臺灣府志長而色白者是舊種圓而黃赤者出自文來國金姓者攜回故名金薯○諸羅縣志他物下種必用子用仁或原物根芽獨薯不然取一條片片切之只留皮一面種之發根生苗亦一異也

氣味甘平無毒主治補中和血暖胃肥五臟白皮白肉者益肺氣生津中滿者不宜多食能壅氣煮時加生薑一片調中與薑棗同功紅花煮食可理脾血使不外洩敏按甘藷俗傳能發諸病患痔漏者愈後食之復發亦以性能下行而滯氣故也

痢疾下血傳習錄云痢疾之起多因脾胃先虛而後積滯成痢其有脾氣虛甚欲健中焦者必宜甘

溫之藥。其有命門不暖。欲實下焦者。必宜純熱之藥。至若溼熱所致。煩熱口燥。腹痛純紅。小水黃赤。以及下血者。用此薯蒸熟。以芍藥湯頻頻嚼服。或薯粉調冬蜜服。亦愈。

酒積熱瀉。傳習錄云。泄瀉之症不一。或水土相亂。併歸大腸而瀉。或土不制水。清濁不分而瀉。或小腸受傷。氣化無權而瀉。或真陰虧損。元陽枯涸而瀉者。此皆各從其類治之。若酒溼入脾。因而殮泄者。用此薯煨熟食。

溼熱黃疸。黃疸之症有四。一曰陰黃。由氣血敗也。一曰表邪發黃。卽傷寒症也。一曰膽黃。驚恐所致也。更有陽黃一症。或風溼外感。或酒食內傷。因溼成熱。因熱成黃者。用此薯煮食。其黃自退。

遺精淋濁。遺精之與淋濁。症有不同。故治亦不同。然大要責在心脾腎。故凡遇此症。無論有夢無夢。有火無火。或氣淋血淋膏淋勞淋。總宜調養心脾。每早晚用此粉調服。大有奇功。

血虛經亂。婦人血虛。或遲或早。經多不定。故陽虛補其陽。陰虛補其陰。氣滯順其氣。其有不宜辛燥寒涼而宜於清和者。用此薯饗殮頻服。調養其脾。使脾健生化。經期自定。

小兒疳積。疳者乾也。在小兒爲五疳。在大人爲五勞。其病由於哺食乾燥之品。嗜啖肥厚之物。妄服峻利之藥。以致津液乾涸。延而成疳。此薯最能潤燥生津。安神養胃。使常服之。則舊積化而疳愈矣。甘薯粳。羣芳譜云。造粳將糯米水浸五七日。以米酸爲度。淘淨曬乾。搗成細粉。看晴天將糯米粉入

生水。和作團子如杯口大。卽將薯根拭去皮。洗淨沙石土。徐徐磨作漿。要極細。勿攪水。將糯團煮熟。撈入瓶中。用木杖盡力攪作糜。候熱得所。大約以可入手爲度。將薯漿傾入。每糯粉三斗。入薯漿一觔。攪極勻。先將乾小粉篩平板上。次將糜置粉上。又著乾粉捍薄。曬半乾。切如骰子樣。曬極乾。收藏。用時慢火燒鍋令熱。下二合許。慢火炒。少刻漸軟。漸發成圓球子。次下白糖芝麻。或更加香料炒勻。候冷極浮。肥。每粳二升。可炒一斗。芋漿山藥漿俱可作。按此物食之。厚腸胃。健腳力。縮痰涎。解毒活血。甚妙。

甘薯粉。功同甘薯。造法。用薯根粗布拭去皮。水洗淨。和水磨細。入水中。淘去浮渣。取澄下細粉曬乾。同豆粉用。此粉水作丸。與珍珠沙谷米無異。按此粉余前在閩中及玉環俱有。土人造以售客。販行遠方。近日寧波及乍浦多有販客市粉。價賤於麪粉。近日餅餌舖中。率多買此攪和麥麪中。作果餌以售。其粉亦高低不同。有曰淨粉。則依前法所造者。滾水沖之。儼如藕粉。故藕粉店中亦多買此攪和。非有識者莫辨。有曰行粉。則連浮渣一切皆磨細和入。只可作餅餌用。其色亦黃而不白。然其又有甜苦二種。沙土細潔者。則其茹作粉甜。倘先一年種烟其地。次年種茹。則苦澀。人不售之。惟堪作粉。味亦苦矣。但以味甘有清香。化開色如玉者佳。

甘薯酒。和脾暖胃。止瀉益精。造法。用薯根不拘多少。寸截斷。曬乾。飯炊熟。取出揉爛。入瓶中。用酒藥研細。攪和按實。中作小坎。候漿到看老。如法下水。用絹袋濾過。或生或煮熟任用。其入飯寒暖。酒藥分

兩下水升斗。或用麴蘖。或加藥物。悉與米酒同法。若造燒酒。卽用薯酒入鍋。如法滴糟成。頭子燒酒。卽用薯糟造。當用燒酒。亦與酒糟造。燒酒同。此酒福建最多。土人名土瓜酒。燒酒曰土瓜燒。其酒味微帶苦。峻烈不醇。不善飲者。食之頭目微有昏眩。亦無大害。閩中紹酒價貴。此酒值廉。土人相率飲此。亦以餉客。

山百合

此百合之野生者。瓣狹長而味甘。山人採貨之。○藻異云。百合有三種。一名山百合。花遲不香。二名檀香百合。可食。三名虎皮百合。食之殺人。○百草鏡。百合白花者入藥。紅花者名山丹。黃花者名夜合。今惟作盆玩。不入藥。百合以野生者良。有甜苦二種。甜者可用。取如荷花瓣無蒂無根者佳。能利二便。氣虛下陷者忌之。

逢原云。余親見包山土罇中。蚓化百合。有變化未全者。大略野生百合。蚓化有之。其清熱解毒。散積消痰。乃蚓之本性耳。○應驗方。癰疽無頭。野百合同鹽搗爛敷。

甘入肺。清痰火。補虛損。治肺癰。救生苦海。取白花者三兩搗爛。白酒和絞。取汁一盃。不拘時服。七服全愈。

石衣石

台州仙居有之。生峻嶺絕壁海崖高處。乃受陰陽雨露之氣。漸漬石上。年久則生衣。鮮者翠碧可愛。乾者面黝黑。背白如雪。土人以作羹餉客。最爲珍品。煮法用滾水一盃。投鹽少許。泡石衣於中。用手細細擺揉。去其細砂。待軟如絲。其細砂去淨。色卽變紫如玫瑰。必得鹽水。則所銜細砂始能吐盡。再過清水二三次。以雞湯下食。滑脔鮮美。味最香甜。爲山蔬第一。台州六屬。惟仙居有之。或云各處深山皆有。非仙居人不能取。故仙居人有專業此爲生者。近則一二百里。遠則數百里外。向深巖危壑。人跡莫能躋。攀者壁上始有此物。其取之法。人則藤兜飛架。衣雞毳。躡鞋趨。捷如猿猴。取之則銛鈎鋒鏟輪組。入山有祭。買路有楮。非仙土人莫能盡其術也。然結侶雖多。其采取止許一人往。不得兩人並採。亦奇也。每年必損人。故其值昂。而貪利者且競趨之。

味甘氣清。性寒無毒。清膈熱。利小水。化痰消癭。結滯氣。有補血明目之功。婦人食之。能潔子宮。易於受孕。胎。男子食。益精增髓。

石耳

羣芳譜。石耳一名靈芝。生天台四明河南宣州黃山巴西邊微諸山石巖上。遠望如烟。廬山亦有之。狀如地耳。山僧採曝餽遠。洗去沙土。作茹。勝於木耳。○粵志。韶陽諸洞多石耳。其生必於青石。當大雪後。石滋潤。微見日色。則石生耳。大者成片如苔。蘚碧色。望之如烟。亦微有蒂。大小朶朶如花。烹之面青紫。

如芙蓉底黑而皺。每當味爽擷取。則肥厚。見日漸薄。亦微化爲水。凡香蕈感陰溼之氣而成。善發冷氣。多和生薑食。乃良。惟石耳味甘腴。性平無毒。多食飢人。能潤肌童顏。在木耳地耳之上。○南粵瑣記。凡青石以烈日輒出汗。汗凝結則成石耳。青爲木氣。故生耳。若白石則否。或曰。此亦蕈之類。厚者蕈。薄者耳。或曰。凡乳牀必因石脈而出。不自頑石出。其在陰洞者爲乳牀。在陽巖者爲石耳。石耳之美。見稱於伊尹。其言曰。漢上石耳。蓋上古已珍之矣。

性寒。或曰平。味甘腴。無毒。○藥性考。石耳寒平。石崖懸珥。氣並靈芝。久食色美。益精悅神。至老不毀。瀉血脫肛。灰服愈矣。○名勝志。安吉州梅溪石門中產石耳。食之止熱。

野芋青芋 野芋頭 土芋 藤 鬼芋

汜勝之農書。芋有六種。五野芋。六青芋。野芋有大毒。殺人。凡芋三年不收。卽成野芋。性滑。下石毒。服食皆忌之。青芋亦有毒。必須灰汁易水煮之。堪食。只宜蒸啖之。中野芋毒者。令人戟喉音啞。煩悶垂死。以大豆漿或糞汁解之。糞汁亦可。

葛祖遺方。合麻藥。治跌打損傷。痔漏麻風。敷腫毒。止痛。治瘡癬。搗敷腫傷。
乳癰。野芋頭和香糟搗敷。

青芋

療冷熱止渴。

土芋藤

土芋卽黃獨。俗名香芋。肉白皮黃。形如小芋。一名土卵。與野芋不同。綱目野芋附家芋內。土芋另立一條。可知。然所引僅據陳藏器一說。不知其功能稀痘。小兒熟食。大解痘毒。其藤燒灰傅。痘爛成瘡。可無癍痕。○羣芳譜。土芋。其根惟一顆而色黃。故名黃獨。

野芋頭

文堂集驗。一名仙人掌。同野芋一種。但此種葉較小。略似茨菇。葉有尖。此又與草本形如鞋底者不同。

仙人掌
如鞋底。

治諸物食積。已成痞塊者。用野芋頭磨爛。和糯米粉淡煮粥。每早食一茶鍾。不用油鹽。十服後。其積自消。試驗無害。錄

鬼芋

羅浮志。深谷中產物如薯芋狀。山人得之。剖作四片。入砂盆磨作膠漿。鍋煮成膏。待冷。則凝結如餅塊。一復剖爲四片。添水再煮成膏。膏成。照前三煮四煮。乃可食令飽。一芋所煮。可充數十人之腹。故稱鬼芋焉。芋有四異。初生不藉根苗。葉上朝露著地。卽成種子。一異也。採製不令婦人雞狗見之。見卽化水。

二異也。磨時煮時。七須順旋。逆之卽化水。三異也。一芋之成。由一而四。四而十六。十六而六十。六十有四。如卦象之數。四異也。聞廬山衡嶽各有鬼芋。採製又不同。

野毛豆

野毛豆生園隰中。蔓生。枝細弱。葉細尖。兩兩排枝對生。清明後開淡紫細花。結實如毛豆。立夏後可採。初生苗絕似金鳳花苗葉。其莢儼似角蒿。中有子二。圓如小菘豆。小滿前後皆黑。老便枯落矣。○生田塍閒。莖葉及莢較家者細小。一名勞豆。

沈氏效方。性微寒。平肝火。治疳疾目疾。○百草鏡。治黃白疸。性能發汗。救生苦海。治痘毒。八九月時。田塍邊採。連莖根用。煨存性研。單用其豆更妙。麻油和敷。不問初起日久。未潰已潰。俱效。

按通雅引焦弱侯曰。野田小豆曰疎。音勞。陳留耆舊傳云。赤眉以豎豆與桓牧。隋末子通攻江都。夏侯端採豎豆食之。身之曰野豆也。魯刀切。勞豆。或疎豎二字之訛也。然考古今註。豎豆一名治豆。葉似葛。而實長尺餘。可蒸食。一名豎菽。綱目鹿藿一名豎豆。又名鹿豆。卽今野菘豆。爾雅釋草。藿鹿藿。注。今鹿豆也。唐書夏侯端傳。搗豎豆以食。則似又非野毛豆之屬。今野毛豆亦名豎豆。豈名同而物異歟。並書之以俟考。

肝疳初起。百草鏡。野毛豆鮮者七錢。乾者五錢。雞肝一具。同煮食。煎服亦可。

野蘿蔔地骷髏三生蘿蔔。

一名紫金皮。又名巴壁虎。○百草鏡云。野萊蕪苗葉根形與家種者無二。肉雖白。而皮色帶黃爲異。○王氏博濟方。以乾萊蕪爲仙人骨。俗又呼地骷髏。

雁山志。山蘿蔔性寒。狀如圃種者。土人用治癰疽。搗汁服之。渣塗亦可。庚戌。予來臨安。署內有廢圃。多商陸。土人呼爲山蘿蔔。與此名異。

圃物

治肺癰。百草鏡。以七枚搗汁服。

地骷髏

按地骷髏。乃刈萊蕪時偶遺未盡者。根入地。瘦而無肉。老而多筋。如骷髏然。故名。能大通肺氣。解煤炭熏人毒。非乾萊蕪也。王禹中所言。尙未明晰。

痞塊。醫宗彙編。陳年木瓜一個。地骷髏。卽蘿蔔種枯根。四兩。煎汁。時常服一小盞。數日除根。氣痞食痞俱治。

萬應丹。海昌方。治黃疸變爲臃脹。氣喘翻胃。胸膈飽悶。中脘疼痛。并小兒疳疾結熱。噤口痢疾。結胸傷寒。傷力黃腫。并脫力黃各症。用人中白。以露天不見糞者方佳。火煨醋淬七次。一兩。神麴。白荀子。地骷髏。卽土中蘿蔔。各五錢。砂仁二錢。以上俱炒。陳香櫞一個。共爲末。蜜丸桐子大。每服三五七丸。或燈

草湯下或酒下。

三生蘿蔔

此乃人工製造者。唐正聲傳此法。云得自祕授。取水蘿蔔一枚。周圍鑽七孔。入巴豆七粒。入土種之。待其結子。取子又種。待蘿蔔成。仍鑽七孔。入巴豆七粒。再種。如此三次。至第四次。將開花時。連根拔起。陰乾。收貯罐內。遇臃脹者。取一枚搥碎煎湯服之。極重者二枚立愈。

南瓜蒂附

綱目南瓜主治。止言補中益氣而已。至其子食之脫髮。今人以爲蔬。多食反壅氣滯膈。昔人皆未知也。吳秀峯言。凡瓜熟皆蒂落。惟南瓜其蒂堅牢不可脫。昔人曾用以入保胎藥中。大妙。蓋東方甲乙木屬肝。生氣也。其味酸。胎必藉肝血滋養。胎欲墮則腹酸。肝氣離也。南瓜色黃味甘。中央脾土之精。能生肝氣。益肝血。故保胎有效。

神妙湯保胎。用黃牛鼻一條。煨灰存性。南瓜蒂一兩。煎湯服。永不墮。
疔瘡。行篋檢祕。用老南瓜蒂數個。焙研爲末。麻油調塗。立效。

南瓜瓢

治湯火傷。慈航活人書。伏月收老南瓜瓢。連子裝入瓶內。愈久愈佳。凡遇湯火傷者。以此敷之。卽定疼。

如神。

辣茄

人家園圃多種之。深秋山人挑入市貨賣。取以熬辣醬及洗凍瘡用之。所用甚廣。而綱目不載其功用。陳旻堯食物宜忌云。食茱萸卽辣茄。陳者良。其種類大小方圓黃紅不一。惟一種尖長名象牙辣茄。入藥用。○又一種木本者。名番薑。范咸臺灣府志。番薑木本。種自荷蘭。開花白瓣。綠實尖長。熟時朱紅奪目。中有子辛辣。番人帶殼啖之。內地名番椒。更有一種結實圓而微尖。似柰種。出咬囉吧。內地所無也。○藥檢云。辣茄一名臘茄。臘月熟。故名。亦入食料。苗葉似茄葉而小。莖高尺許。至夏乃花。白色五出。倒垂如茄花。結實青色。其實有如柿形。如秤錘形。有小如豆者。有大如橘者。有仰生如頂者。有倒垂葉下者。種種不一。入藥惟取細長如象牙。又如人指者。作食料皆可用。

食物宜忌云。性辛苦大熱。溫中下氣。散寒除溼。開鬱去痰消食。殺蟲解毒。治嘔逆。療噎膈。止瀉痢。祛脚氣。食之走風動火。病目發瘡痔。凡血虛有火者忌服。○藥檢云。味辛。性大熱。入口卽辣舌。能祛風行血。散寒解鬱。導滯止瀉。瀉擦癬。

百草鏡。熏壁蝨。洗凍瘡。浴冷疥。瀉大腸。經寒癖。

外痔。百草鏡。以象牙辣茄紅熟者。挫細。甜醬拌食。

毒蛇傷。百草鏡。用辣茄生嚼十一二枚。卽消腫定痛。傷處起小泡出黃水而愈。食此味反甘而不辣。或嚼爛敷傷口。亦消腫定痛。

祛臭蟲方。經驗廣集。用羊骨頭一個。秦椒半觔。共入火盆內。同鋸木屑燒之。門窗閉緊。勿令出烟。其蟲自死。敏按木屑用樟木者佳。

凍瘡。蔡雲白方。剝辣茄皮貼上。卽愈。

痢積水瀉。醫宗彙編。辣茄一個爲丸。清晨熱豆腐皮裹吞下。卽愈。

敏按花鏡。番椒一名海瘋藤。俗呼辣茄。本高一二尺。叢生白花。秋來結子。儼如秃筆頭倒垂。初綠後朱紅。懸掛可觀。其味最辣。人多採用。研極細。冬月以代胡椒。蓋其性熱而散。能入心脾二經。亦能祛水溼。癸亥予在臨安。有小僕於暑月食冷水臥陰地。至秋瘡發。百藥罔效。延至初冬。偶食辣醬。頗適口。每食需此。又用以煎粥食。未幾瘡自愈。良由胸膈積水變爲冷痰。得辛以散之。故如湯沃雪耳。又名秦椒。李成裕遼載。秦椒一名番椒。形如馬乳。色似珊瑚。非本草秦地之花椒。卽中土辣茄也。

龍柏藥性考。秦地乃草本辣椒。綱目諸註。誤爲秦地花椒。不知卽今之辣茄。又名辣虎。性熱味辣。溫中散寒。除風發汗。去冷癖。行痰逐溼。多食眩旋。動火故也。久食發痔。令人齒痛咽腫。

刀豆根附殼

綱目穀部刀豆條發明下註刀豆本草失載惟近時小書載其煖而補元陽近有人燒其子存性白湯調服止呃逆有效故瀕湖特爲增入而不知其用甚廣今悉補之

治頭風 集聽云刀豆根乃治頭風之神藥每用須五錢酒煎服

治鼻淵 年希堯集驗方老刀豆文火焙乾爲末酒服三錢重不過三服卽愈

穀 治腰痛萬氏家抄用刀豆殼化灰好酒調服外以阜角燒烟熏之

牙根臭爛 洪氏一盤珠刀豆殼燒灰加冰片擦涎出卽安

治久痢 種福堂方用刀豆莢飯上蒸熟洋糖蘸食一二日卽愈

治婦女經閉腹脅脹痛欲死并消血痞 經驗廣集陳年刀豆殼焙燥爲末好酒服一錢加麝香五釐

亦妙

喉癰 張氏必效方刀豆殼燒灰以二三釐吹之立效

楊梅瘡 萬氏濟世方當歸川芎苳仁木通木瓜生地熟地金銀花防己防風荆芥黃蘗白芷知母甘草

草阜莢豬苓去皮各二兩人參二錢山紅花刀豆殼各五錢硬飯團二兩水煎一鍋濃汁不拘時當茶

服忌魚腥生冷四劑全愈

地腎

粵志羅浮多地腎一名松黃。但松黃未落爲松實。已落而英華未散爲地腎。其狀若彈丸。大者如雞卵。紅黃相錯。一一晶瑩。熟之可入饌。其生無根蒂。散布松下。土鬆石潤處有之。或亦松蕈之類也。乍浦九山補志。松花蕈。山之有松者皆產。惟陳山東麓爲多。三月閒松花入土。至四五月經雨後卽生。至八九月又生。鮮肥滑嫩。素品之上味也。

葛乳

一名葛花菜。名山皆有。亦產高州。粵志高州多種葛。雷州人市之爲絺綌。秋霜時有葛乳涌生地上。如芝如菌。赤色。味甘脆。微苦。乃葛之精華也。亦曰葛蕈。瀕湖僅據太和山志載其醒酒。與酒積成疾。他皆未及。故特補之。

性涼。解肌熱。散風火。及陽明風熱癩疹。

鮮草果

粵志人多種之爲香料。卽杜若。非藥中草果也。其苗似縮砂。三月開花作穗。色白微紅。五六月結子。其根勝於葉。

味辛溫。能除瘴氣。久服益精明目。令人不忘。

眞珠菜

六安有眞珠菜。如眞珠。○益部方物略記。眞珠菜。戎瀘等州有之。生水中石上。翠縷纖蔓。首貫珠。蜀人以蜜熬食之。或以醃煮。可致千里不壞。○黃山志。眞珠菜。藤本蔓生。暮春發芽。每芽端綴一二蕊。圓白如珠。葉翠綠如茶。連蕊葉。腊之。香甘鮮滑。他蔬讓美。利水通淋。結消腹脹。下氣癰閉。

鷓鴣菜

連江志。生海石上。色微黑。○漳州府志。鷓鴣菜。散碎花。微黑。出漳浦。

療小兒腹中蟲積。食之卽下如神。

葛仙米

生湖廣沿溪山穴中石上。遇大雨衝開穴口。此米隨流而出。土人撈取。初取時如小鮮木耳。紫綠色。以醋拌之。肥脆可食。土名天仙菜。乾則名天仙米。亦名葛仙米。以水浸之。與肉同煮。作木耳味。大約山洞內石髓滴石所成。性寒。不宜多食。四川亦有之。必遇水衝乃得。歲不常有。他如深山背陰處。大雨後石上亦閒生。然形質甚薄。見日卽化。或乾如紙。不可食矣。○梧州府志。葛仙米。出北流縣勾漏洞石上。爲水所漬而成。石耳類也。采得曝乾。仍漬以水。如米狀。以酒泛之。清爽襲人。此原非穀屬。而名爲米。傳云。

晉葛洪隱此乏糧。采以爲食。故名。○嶺南雜記。韶州仁化縣丹霞山產仙米。徧地所生。粒如粟而色綠。煮熟大如米。其味清腴。大抵南方深山中皆有之。○宦遊筆記。出粵東葛仙洞外。有流泉噴薄石上。遂生苔菌之類。其狀如米粒。青色。莖以爲羹。味極鮮美。土人呼爲葛仙米。有未識者。疑是青螺。按韶州府志。丹霞出仙米。頗與此相類。但一生沙土。一生水石。爲異耳。○陸祚蕃粵西偶記。道書寶圭洞天。卽今北流縣勾漏山。洞口前後產葛仙米。采而乾之。粒圓如黍。揉麪釀酒。極芳香。性寒。味甘爽。解熱清膈。利腸胃。

按葛仙米本屬石耳之類。憶庚子歲曾於劉明府席間食之。時以爲羹。儼如青螺狀。翠碧可愛。味極甘鮮。滑脔適口。入蔬爲宜。藥性考云。清神解熱。痰火能療。或云。久服延年。蓋亦能清臟熱者。

黃矮菜

一名黃芽菜。咸淳臨安志。冬閒取巨菜覆以草。積久而去其腐。葉黃白鮮瑩。故名黃芽。萬歷杭州府志。杭人訛爲黃雅菜。戒庵漫筆。黃矮菜。杭州呼爲花交菜。○羣芳譜。燕京圃人以馬糞入窖。壅培菘菜。令不見風日。長生苗葉。皆嫩黃色。肥美無滓。謂之黃芽菜。乃白菜別種。莖葉皆扁。

甘溫無毒。利腸胃。除胸煩。解酒渴。利大小便。和中止嗽。冬汁尤佳。○食物宜忌。味甘性溫。滑利竅。○陳堯士云。補虛羸。

按黃矮菜有南北二種。南產者。惟杭城太平門外沙地產者爲最。他處悉高大粗鬆。絕無捲心密葉味亦較遜。北產糧艘帶來者。味更美。質更細。且無粗筋。有重至十餘觔一顆者。南中亦不易得也。陳確齋云。食之潤肌膚。利五臟。且能降氣清音聲。惟性滑洩。患痢人勿服。

白茄

葉蒂

汪連仕方。一名玉盤茄。有大小二種。大者如雞卵。小者如指頭。初生色白。老則皮黃。能入骨追風。治一切癱瘓。根名白風藤。合酒蒸服。茄實蘸硫黃。擦白癩風。除大麻風。東粵茄園產者良。名茄丸。

葉。治腸紅大便下血。劉羽儀驗方。用白茄子葉。經霜方採。刷淨毛。去焦黃葉。陰乾。取三四葉。煎濃湯。如此喫三四次。其血卽止。永不復發。此方曾經邪犬咬過之人勿服。

蒂。治發背及一切毒癰初起。味水軒雜記。用白茄蒂七個。生首烏等分。酒煎服。卽消。

天茄

出廣中。如大拇指。其形如茄。而有棱。黑色。堅如石。擊之不得碎。其蒂黃黑如醬色。一種牽牛花嫩子。蘇人采爲蜜餞入食品者。亦名天茄。大能破氣。與此迥別。

胃脘痛。救生苦海。水磨服之。每服一枚見效。

蠟毒。五雜俎記。關中有天茄。可治蠟毒。

牛心茄子

產瓊州。一核者入口立死。兩核者可以羹清解之。入外科膏藥用。麻藥用。此藥只可外敷。不宜內服。

緬茄

高濂珍異藥品云。緬茄。一作沔茄。形如大栗。上有罩帽。如畫皮樣。出滇南緬甸地方。堅如石。○滇略。緬茄。枝葉皆類家茄。結實似荔枝核。而有蒂。土人雕刻其上。而繫之。拭眼去翳。亦解瘡毒。○滇南雜記。緬茄。出緬甸。大而色紫。蒂圓整。蠟色者佳。○粵志。廣東高州府出木茄。上有方蒂。拭眼去昏障。卽緬茄也。水磨塗。治牙疼。抹眼眶。去火毒。又能解百藥毒。

治疗瘡走黃。良朋彙集。此方出寶坻張相公。百發百中。真神效方。凡疔瘡走黃。毒攻入內。不知人事。但有氣者可救。用緬茄一枚。以磁盃盛黃酒。將茄放盃內。磨得下。磨不下。只管於酒內磨一鍾。約熟茶時。將酒裝入長頸錫壺內。再入連鬚葱二根。牙咬不令斷。白豇豆七粒。如蕎麥開花時。加蕎麥七粒。別時不用。又用小麥。令衆人口嚼成麵筋。封固壺口。放水鍋內。煮一炷香。取出。熱服。出汗卽愈。

醬茄

糟

此卽人家醬中食茄。入藥宜陳年者佳。治耳癢出膿。妙藥方。醬茄擠汁滴之。

治牙疼。周氏家寶方。醬茄燒灰存性爲末。掩患處。
腹內紫瘰。壽域方。陳年醬茄燒存性入麝香輕粉少許。脂調貼之。

糟茄

山海草函。燒灰存性。治鵝口疳。

玉瓜

卽廣昌土瓜。出江西。常中丞宦遊筆記。廣昌土瓜。本草不載。形甚拙。圓者如瓠。或磊砢如贅疣。無瓣無瓢。長沙土中。外汗內潔。細肌密理。剖之白如冰玉。入口清甘無滓。消煩釋滯。或熟食之。亦佳。殆瓜中異品也。其性蔓生。春種而秋成。冬初始入市。無種。春深後。切瓜連皮成小塊。用沙土覆於室內。久之芽生。於是就沙地爲窖。令深而寬。藉以茅。欲其中通而根可旁達。旣長。密葉蔓生纍纍。插竹引之上行。培以雞糞。乃繁碩。土人又名玉瓜。抱朴子云。五原蔡誕入山而還。語家人曰。予至崑崙得玉瓜。以玉瓜井水洗之。乃軟可食。是豈其遺種耶。江西他縣亦有產者。然小而渣多。惟廣昌附郭五里內爲佳。予食於元宵後。喜其味美。至郡覓之。東風送暖。瓜卽不可留矣。

味甘性平。調中益氣。舒鬱化滯消食。清大小腸火。生津滋血。和營衛。熟食補脾健胃。

節瓜

粵草志。節瓜乃冬瓜中一種小者。白皮。蔓地生。一節生一瓜。得水氣最多。故解暑毒。止渴生津。驅暑健脾。利大小腸。

穿腸瓜

吉雲旅鈔。穿腸瓜乃大便解出甜瓜子。生苗結實。土人名糞甜瓜。不拘大小。皆可入藥。採來曬乾。新瓦焙焦爲末。乳鉢研極細。攤地上。出火毒。收貯聽用。但此瓜不易有。須以人力製造。其法。將爛熟甜瓜與七八歲小兒空心帶子食之。令其勿嚼碎子。次日解出大便。子裹糞內。帶糞曝乾。時早卽於本年下出。倘時晚不及生瓜。花亦可用。否則藏於次年下種更好。大人便出者。子亦可種。此瓜生在夏秋。若春冬要用。必須預備。

治痔漏。吉雲旅鈔。有祕授消痔神方。不論遠年近日痔漏。三服除根。用穿腸瓜焙存性爲末。每末一兩。加蟬蛻末三錢五分。以金銀花五錢。浸酒一二日。煎數滾。調藥末。每服二錢七分。空心金銀花酒下。外以白海南花並根葉煎湯。不時先熏後洗。三日卽愈。海南花春冬無鮮者。預收陰乾備用。蓋痔漏乃大腸鬱火。臟腑積熱。發而爲腫。爲痛。爲瘡。久而成管。今用此藥以散火消毒。去積除壅。其管自退。不問新久。屢試屢驗。忌房事惱怒。煎炒辛辣熱物。並發氣之類。百日永不再發。此方傳自西洋僧。有洋客患痔漏痛甚。不能上海船。其僧出此藥與服。三日卽愈。求其方。送洋布十匹。黃金五兩。始得此方。用無不

效。

天骷體

此乃鄉野村中桑樹及屋籬上所掛霜打絲瓜也。其子名烏牛子。

治婦人白帶血淋。臃脹積聚。一切筋骨疼痛。並宜服之。汪連仕方。

鬼骷體

汪連仕云。乃殘老之向日葵。其子性烈。通氣透膿。合麝香。急性子。搗爛爲膏。貼臍。能落胎。

敏按。冬日桃園中有樹上乾枯殘桃。亦名鬼骷體。與此名同物異。

白鼓釘

宦遊筆記。口外白鼓釘。卽內地蒲公英。葉有鋸齒。婆婆鋪地。與內地生者迥殊。內地者。花早開單瓣。生沙漠者。花開於夏至前。宛似黃菊。一望燦然滿地。其蕊瓣重疊。顏色嬌媚。暮春草甫萌芽。口外啖此味。用之不竭。不啻春韭秋菘也。採食之。清火。亦爲通淋妙品。其莖中折斷有白汁。諸蟲盛夏孕育。人手觸之成疾。百藥難效。取汁厚塗。卽愈。鄭方升云。一莖兩花。高尺餘者。掘下數尺。根大如拳。旁有人形拱抱。搗汁酒服。治噎膈如神。按上所載。皆綱目未及言者。且口外所產。又與內地異。綱目蒲公英入柔滑類。歸草部。今沙漠所產。人以作菜茹。故入菜部。亦各從其類也。

清火毒鬱熱通乳通淋消腫治膈噎療一切毒蟲蛇傷

三寶薑

香祖筆記產臺灣鳳山縣相傳明初三寶太監所植治百病有效

鬱薑

滇南記產雲南百夷中餌一刀圭終其世斷絕人道土人以飼牧馬不之宦也

川薑

出川中屈曲如枯枝味最辛辣絕不類薑形亦可入食料用○包汝楫南中紀聞云扶叢鄉孺人攜木薑土茶餉余受其木薑作羹味如茱萸醬卽此物也

味辛性熱治胃寒散冷積寒澀痰氣

沙葱

西北遊記口外沙石中生野葱一名楞葱一名沙葱石楞中所產故名楞沙磧中所產故名沙其葉與家葱同大更過之味辣於家葱根絕似蒜頭大更過之味亦辣於蒜善食辣辛者不能罄一枚雖細如草莖攢生於沙磧甚密醃之調羹勝如韭雉羹兔羹尤宜又有沙葱草與沙葱相似人食之心迷亂馬食之腹隱痛惟宜於橐駝採者折以辨之沙葱本脆折易斷此草柔韌難折入藥取根○西域聞見錄

丕雅斯類野蒜。頭大如雞子。葉如葱而不中空。味辛。甘肅人呼爲沙葱。回人嗜之。寬中下氣。消食解肌。活血發汗。表風寒。滌宿滯。

風葱

臺志出臺灣。療風疾。

番蒜

徐昆柳崖外編。番蒜出臺灣番地。外形似木瓜。中似柿。有浮山張氏。宦於閩。一婢食鱉肉後誤食。遂病。面黃腹脹。硃砂欲死者數矣。半載後。有饋番蒜者。婢偶食之。遂大瀉。有物如小鱉者數十。少頃。爽然疾若失。方知番蒜可治鱉毒也。

治鱉瘕。解食毒水毒。

蒜梗

此大蒜近瓣處中心短梗也。乾者入藥用。

治瘡成管。年希堯集驗方。用大蒜梗燒灰存性。搽患處。其管自消。

坐板瘡。黃氏醫抄。用蒜梗燒灰爲末。先洗淨去靨。將藥末搽上。

洗漏立驗。良朋彙集云。夏應遴試效過。防風。荆芥。地骨皮。川椒。蘄艾。瓦松。各五錢。槐條一兩。陳蒜梗。

二兩共入麻布袋內熬滾熱盪止疼神效。

熏痔瘡。救生苦海。蒜梗陰乾以火盆置微火。將梗投入。移火盆於木桶中。令患者坐熏之。四圍以衣被塞緊。勿走洩烟。三次自愈。

凍瘡。種福堂方。大蒜煎湯洗之。

刺兒菜

西北遊記。卽內地之紫花地丁。俗呼刺兒菜。葉如柳。有刺毛。夏開紫花。生平地者起莖。生溝壑者起蔓。內地在在有之。生口外沙漠者。花開於夏至後。大如蒜頭。色紫可愛。人多採食之。暮春萌芽之際。挖其根。狀如大枝人參。色較微白。巨者如蘆菔。烹調適口。誠塞外鮮品。然乾其根。帶回內地入藥。其清火之功。勝於金銀花。解毒之用。更捷於山茨菇。一物而兼二物之用如此。

清火疎風豁痰。解一切疔瘡癰疽腫毒如神。

波斯菜

卽今紅菜。一名洋菜。汪連仕云。生長海陽者佳。根本紅豔。色鮮麗。

止血。治刑杖瘀血攻心。搗汁沖酒服。卽散。可理跌打。

乾冬菜。陳冬菜。補。糞金子。陳芥。

冬菜乃白菜。杭俗小雪前後，居人率市白菜，以鹽醃之作齋，藏爲禦冬及春時所食，名曰冬菜。頗利膈下氣。其滷汁煮豆及豆腐食，能清火益肺，誠食中佳品也。至春分後，天漸暖，菜亦漸變黑色，味苦不堪食。以之曬作乾飯，鍋上蒸黑，再曬再蒸，如此數次，乃曝之極燥，貯缶器中，可久藏不壞。名曰徽乾菜。卽乾冬菜也。年久者，出之頗香烈開胃，噤口痢及產蓐，以之下粥，大有補益。蓋白菜本能和中下氣，利三焦，通二便，含土德之精，有生金之用。乾之則苦，返其初而從母化也。久蒸久曬，則味反甘，全其德，故有中和之運，功與參耆等。惜乎世多忽而不知，余故特爲表之。瀕湖綱目，菘下無乾菜之用，殊爲缺略。近日，甯橋人所市者，乃蘿蔔莖所乾，與芥菜乾蒸曬成者，皆不入藥。須人家冬白菜醃作蒸曬，年久者爲佳。○羣芳譜有造黑醃齋法，用白菜如法醃透，取出，挂於桁上，曬極乾，上甑蒸熟，再曬乾收之，極耐久藏。夏月以此齋和肉炒，可以久留不臭，卽今乾冬菜也。

開胃下氣，益血生津，補虛勞，已痰嗽。年久者，泡湯飲，治聲音不出，和酒搗爛，塗湯火傷。
白火丹。黃氏傳方。此症形如水脹，肢體俱腫，皮膚色白，飽脹不食，畏見燈火，用冬菜勿落水，陰乾，陳三年者，可用，愈陳愈妙。煎湯洗浴，并煎服之，立消如神。

陳冬菜滷汁

清肺火痰嗽，解咽喉腫毒。

物理小識。鹽乾菜水滴蜈蚣即死。以鹽菜炒雞蜈蚣亦不食。

陳芥菜滴汁

味鹹性涼。治肺癰喘脹。用陳久色如泉水緩呷之。下痰清熱定嗽。真能起死回生。○作法。以芥滷貯甕中。埋行人處。三五年取用。

糞金子

凡油白菜收子作種者。其中心老根內必有一子。枯時搖之有聲。剖出名糞金子。以其得糞力。而花實幹中子。又得菜之生氣。大能益人。曰金子。重之也。田種者。其子更佳。○王聖俞云。糞金子在收菜種子時。其中幹內剖出。形如鼠糞而黑色。如麥粒大小。千百幹中不過數十粒。蓋有生不生之別。不能每幹皆產也。

治血症。取三錢炒研。白湯調服。立愈。

治慢驚神效。王聖俞

麒麟菜

出海濱石上。亦如瓠枝菜之類。瓊州府海濱亦產。周海山嶺琉璃國志。載雞脚菜麒麟菜。皆生海邊沙地上。又名鹿角菜。今人蔬食中多用之。煮食亦酥脆。又可煮化爲膏。切片食。綱目鹿角菜云。甘大寒滑。

陳芝山食物宜忌云。微鹹性平。大有消痰功用。瀕湖反引孟詵一說。以爲有微毒。不可久食。能發痲疾。且其主治。止載下食風氣。小兒骨蒸。治丹石熱結。解麪毒。何味其功用。乃爾耶。茲特表之。○朱排山柑園小識。石花菜。生海中。沙石閒。高二三寸。狀如珊瑚。有紅白二種。洗去沙土。煮化凝成膏。糟醬俱佳。又有細如牛毛者。呼牛毛石花。味稍劣。郭璞海賦所謂土肉石華是也。

味鹹性平。消痰如神。能化一切痰結痞積痔毒。○敏按盛京志。龍鬚菜。生於東南海濱石上。叢生。狀如柳根。長者至尺餘。白色。以醋浸食。亦佳蔬也。土人呼爲麒麟菜。出金州海邊。鹿角菜。生東南海中。大如鐵線。分丫如鹿角。紫黃色。乾之爲海錯。水洗醋拌。則如新味。今金州海邊有之。據志則似一類二種也。石花膏。毛世洪養生集。治辛苦勞碌之人。或嗜酒多慾。忽生外痔。發作疼痛。步履難移。服此。或大便瀉一遍。或不瀉。亦卽止痛。可以行走。再用搽洗等藥。自能斷根。用麒麟菜。洗去灰一兩。用天泉水煮。烱和白糖五錢食之。此方乃李治運臬司傳靈隱寺僧。杭人蕭成子患此症。僧往候。授以此方。服之隨愈。予記之後。治數人多效。

諸筍乾

綱目竹入苞木類。以筍附菜部。所載亦止苦竹。篔竹。淡竹。冬竹。諸筍。且於義類多未詳盡。不知春冬所出。性皆各別。鮮乾諸品。味亦迥殊。則入經絡主治。自不能合一。陳芝山食品。眞一筍譜。及食纂所載較

詳。頗近時尙。卽取以補之。

春筍。筍譜。其佳者曰豬蹄紅。冬月卽生。埋頭土中。以鋤掘之。可三寸許。其味極鮮。甲於他筍。未出土名豬蹄紅。若長尺許。則其籊圓。故人名圓筍。亦名蚤筍。蓋冠諸筍而先出者。

味甘辛微寒。下氣養血。利膈消痰。化熱爽胃。解渴利水。療風邪。止喘嗽。

毛筍。卽茅竹筍。筍之大者。筍譜。毛筍爲諸筍之王。其籊有毛。故名。俗呼爲貓筍者。非也。大者重幾二十餘觔。猶未出土。肉白如霜。墮地卽碎。以指搯之。其軟嫩如腐。嗅之作蘭花香。毛筍大者。清明後方有。其出於臘月及正月者。形短小。籊亦有毛。土人名貓兒頭。食之多噯心。然消痰之力。較勝他筍。味甘性平。利九竅。通血脈。化痰涎。消食脹。多食令人易饑。

鞭筍。卽發於竹邊者。夏秋有之。其生於四月者。曰梅邊。蓋感梅雨溼蒸之氣。而生頗早。味淡肉硬。不如秋生者。筍譜。邊筍。卽毛筍之旁出者。方筍盛時。生氣上升。筍皆豎。生氣旣衰。根旣橫生。盡其力可橫。巨十餘丈。至地之邊際。與竹之長短相稱。謂之竹邊。故名邊筍。其狀類鞭。亦名鞭筍。地肥者軟嫩。長尺許。其籊紫色而兼白。其味恬淡而鮮。其氣醇而有蘊藉。不類毛筍之精英盡發洩於外也。味甘性寒。開胃利腸。消痰渴。

冬筍。卽潭筍。沈雲將食纂。貓竹冬生筍。不出土者名冬筍。又名潭筍。

味甘溫。陳芝山宜忌利九竅通血脈治吐血衄血及產後心腹痛一切血症食之肥白人。食消痰滑腸透毒解醒發痘疹中諸筍毒者生薑麻油解小兒及脾虛者多食難化。食物宜忌痘疹不出採未出土冬筍

煮粥食即有生發之意。不藥良方

青筍 卽青竹筍竹細小故出筍色青山閒遍地有之係野竹所生筍也卽時下俗呼水竹者是也。承胡

謀湖州府志天目出筍乾其色綠聞其煮法旋湯使急轉下筍再不犯器卽綠矣

味甘止肺痿吐血鼻衄治五痔并妊娠。食

青筍乾 卽青竹筍鹽湯煮曬乾者出杭臨安天目者最佳色如鸚哥綠有尖上尖毬子二尖等名味

鹹甘性平爽胃消痰

鹽筍乾 以春筍鹽湯煮曬而成有泥黃烏尖直脚等名

味鹹甘性平行氣清痰

衝筍乾 以筍用鹽湯煮熟熏乾而成

味鹹甘性平利膈化痰

羊尾筍乾 主治同

處筍片 俗名素火腿以毛筍微醃湯煮熏乾而成

味甘微鹹。性平。利血消痰。

藁筍片。卽玉版筍。以毛筍淡煮曬乾者。浙閩江西多有。有草鞋底蝴蝶尖玉版等名。湖州府志。藁筍大者。謂之闊綠。有名泥裏黃者尤美。

味甘性平。治實喘消痰。張石頑云。乾筍淡片。利水豁痰。水腫葶藶丸用之。

紅海粉

蟲語。海珠生嶺南。狀如蛞蝓。大如臂。所茹海菜。於海濱淺水吐絲。是爲海粉。鮮時或紅或綠。隨海菜之色而成。或曬晾不得法。則黃有五色者。可治痰。或曰。此物名海珠。母如墨魚。大三四寸。海人冬養於家。春種之。瀕湖田中。遍插竹枝。其母上竹枝吐出。是爲海粉。乘溼舒展之。始不成結。以點羹湯佳。治赤痢風痰。

疳積壞眼。慈航活人書。穀精草。小青草。俱炒。青黛水飛。海粉。刺蒺藜。使君子肉。各一兩。爲末。早用羊肝七片。拌藥三錢。蒸熟食。

拾遺卷九上

器用部

番打馬

形長尺許。內藏油膏。外裹椶皮。可代火把。又可鞭馬。番舶上來。哈喇叭出。○方輿勝覽。做打麻。乃樹脂結成。夜點有光。塗舟水不能入。華夷考曰。做打麻。乃樹脂流落膠汁土內。掘出如松香瀝青狀。內有明淨好者。都似金珀一般。出滿刺加國。

性專殺蟲。不可服。有毒。入外科瘡瘍膏用。

治陰癬。救生苦海。用番打馬。和鉛。水銀。雄硫。樟腦。各等分。豬油和搽。效。○癩疥膿瘡。積善堂良方。麻黃膏。中用之。○疥瘡。救生苦海。番打馬三錢。楓子肉五錢。水銀。杏仁。蛇牀子。各一錢。川椒。樟腦。雄黃。各二錢。用紅爛蓋油。共研勻。擦之。神效。○治疥瘡。應驗良方。用全蠟。乳香。枯礬。大楓子。蛇牀子。土木鼈。川椒。雄黃。水銀。番打馬。輕粉。樟腦。爲末。用爛油爲丸。擦之。卽效。此方番打馬作番答木。

擦諸瘡。并楊梅風毒。經驗。濟世良方。黃蘗去皮一錢。黃連去蘆一錢。川大黃五分。三味另研。雄黃。膽礬。銅青。兒茶。青黛。輕粉。枯礬。各二分。冰片一分半。另研。入大楓子七個。去殼去油。人言壯人七釐。弱者五釐。用番打馬。卽番舶打火把之物。另爲末。瘡毒盛而人壯健能食者。每分五分。毒盛而人弱者。每分用三分。不健不弱之人。每分用四分。和入前藥內。研勻。水銀。壯健人每分用一兩。中等人用五錢。弱極人用三錢。不可多。藥須研極細。否則粒粗。恐傷皮肉。右先將水銀一分。并前藥末一分。入盞內。加真脂。

麻油少許。以指研開。逐漸添油。研至不見水銀爲度。大約如稀糊可矣。於兩手兩足掌後動脈處週圍擦之。每一分藥擦三日。每日早晚各擦一次。每次以七八百擦爲止。大率擦使熱透則住。擦時凡週身破傷處。俱用無麝香膏藥貼之。每日一換。不可經風。避帳幔內。冬月用煖牀厚被褥。卽春夏秋暖時。亦不可見風。擦至七日。必口吐臭涎。若口齒破爛出血者。用黃蜂窩煎湯。候冷漱解。勿嚙下。輕則用花椒湯漱之。擦處多皮破。不可畏痛而少擦。忌魚腥生冷發風等物。及醋茶醬一個月。尤忌房事。其牛肉燒酒團魚之類。忌二三年。若蕎麥麪與羊肉。則終身忌之。每次擦畢。以藍布尺許包裹所擦處。此治楊梅風毒法也。如楊梅瘡初發者。擦五六日全愈。所用藥皆同。惟水銀止用四五錢足矣。不必貼膏藥。○久遠臙瘡。應擦處如有破爛。可於脚手心擦之。其藥料照中等者。亦包布貼膏如前。○下疳及蛙幹重者。亦照中等藥擦治貼膏。○喉內瘡癬潰爛。不能進飲食者。亦照前用中等藥擦。○遍身牛皮風癬。作癢作痛出水者。亦照前用中等藥擦。凡擦藥。仍須內服煎藥兼之。

煎藥方。防風。荆芥。銀花。防己。白芷。連翹。苡仁。白鮮皮。桔梗。川芎。當歸。赤芍。生地。黃連。黃蘗。知母。牛膝。木通。陳皮。羌活。獨活。粉草。梔子。各等分。加土茯苓乾者四兩。鮮者八兩。水六盞煎至三盞。分三次。一曰早午晚服完。自擦起之日。服至七日發口止。虛人加人參二三錢。

痔漏消管藥線。妙靈方。用藥先用燈心試其深淺。頂至極痛處爲率。以藥條如式送入漏口。三日後

又試內根漸漸生肉。條漸漸短。用藥直至滿而止。玉簪花根。白者佳。焙乾四兩。番打馬焙乾三兩。馬兜鈴炒乾二兩。慈石三錢。煨紅醋淬三次。共研極細末。以麪打條。或粗或細。候瘡管用之。通始化去。始再插。

廣瘡。仙遺拾珠。用膽礬三錢。皂礬石黃青黛各二錢。番打馬二錢。硃砂五分。爲末。豬脂一塊。搗勻。夏布包擦手足心。候腹鳴卽止。病自愈。

膿窠瘡。慈航活人書。斑蝥三個。麻黃二錢。番打馬三錢。樟冰五錢。臘豬油二兩。先熬化。次入斑蝥煎焦。撈起。再入麻黃煎焦。撈起。再加番打馬末。同樟冰調勻。搗破瘡頭。以藥點上。立時結痂。次日全愈。

老材香

山陝等省無漆。民間棺殮。俱用松香黃蠟塗於棺內。數十年後。有遷葬者。棺朽另易新棺。其朽棺內之香蠟。名曰老材香。土人用合金瘡藥。按脂蠟乃先天流液之精。又得土以固其力。藉血肉餘氣以凝其神。是一物合三才之用。故入藥功效倍於他草木也。○藥性考。北地古棺中松脂。合金瘡藥止血極效。治跌打損骨。止血瘡血出。生肌定疼。神效。盧氏仙方。金瘡鐵扇散中用之。

縛木藤

綱目藤部有省藤。卽紅藤。集解云。堪縛物。主治止言去風殺蟲。無腦漏治法。

治腦漏。急救方。用縛木紅皮藤燒存性爲末。每用酒服三錢。服後覺有一線從鼻至脊背而下股。其腦漏隨愈。一人一年服一次效。

腸癰。經驗廣集。凡腸癰生於小肚角微腫。而小腹隱痛不止。皮色不變是也。紅藤一兩許。好酒二盃。飲醉臥。午後用紫花地丁一兩許。亦以好酒煎。服後痛必漸止。再服。

敗琉璃浮子

係羊角所造。有五色。惟白者入藥。佛前十餘年者良。去淨油垢。新瓦煨研。

退管漏湯火傷乳痛。急救方。用琉璃片燒灰存性。食後酒服一錢。卽消。

救生苦海。退一切管祕方。手指甲炙黃研細。象牙剉末研細。山甲炙黃研細。乳香沒藥俱炙。硃砂水飛。舊琉璃燈底。佛前白者。用三十年者佳。如若難得。十餘年者亦可用。打碎。麩炒爲極細末。各三錢。合勻再研。用黃蠟四兩。化和爲丸。如椒大。初服五粒。次服六粒。每日加服一粒。加至十四粒止。共服十日。計服九十五粒。至十一日。每日減一粒。至五粒。仍舊逐日加上一粒。加至十四粒。又逐日遞減一粒。如此週而復始。或服至十四粒。每從五粒服起更妙。每日空心陳酒送下。管漸褪出。褪盡爲度。如若未盡。再從頭服起。神效。祕之祕之。

內消痞管神方。陳直夫躬行錄載此方。治痔管如神。有一小兒從高墜下。傷背脊骨。月餘後。生毒潰。

爛成漏。蝨蟲從漏孔中出。經云。外癰透膜者生。內癰透膜者死。此症已屬不治。直夫用此藥一料而愈。亦奇方也。凡諸般漏管皆可服。不獨痔管耳。琥珀燈心研末。象牙屑焙。血餘。須自製。蝨皮。陰陽瓦合好。泥封煨存性。雨前芽茶。舊琉璃底。剪碎。製法同蝨皮。蟬蛻炒。人指甲。不拘手足俱可用。瓦上焙脆爲末。穿山甲炒脆。當歸。白茯苓。豬懸蹄甲殼。夾剪剪碎。製同蝨皮。螻蛄瓦炙。牛皮膠。酒煮化和藥。如不足。加煉白蜜。以上之藥各三兩。小蜂房十個。製同蝨皮。火候更宜輕。勿煨成灰。蛇蛻十條。剪碎。瓦上炙。烱自作汁。將凝卽覆存性。否則過性矣。爲末。同阿膠和搗。搗九。每日早午晚服三錢。滾水送下。一料自愈。已驗過數十人。

痔潰成管。俞曉園鈔方。尅蛇龜活者一個。泥裹。擇朝南牆下背陰處煨。煙盡爲度。去泥用。多年白琉璃底一具。琥珀。象牙。各三錢。珍珠。西黃。冰片。各五分。爲末。摻之。此藥亦可服。每服九分。

肺癰。傳信方。陳年琉璃煨灰存性。陳年油絮。漆匠店有。煉成和勻。酒服。試驗神效。

尿血。救生苦海。用舊琉璃燈洗淨。剪碎。入磁罐內。泥封。火煨。以紅爲度。待冷取出。酒下三錢。

輕粉結毒。救生苦海。用舊琉璃燈燒存性。研。每服二錢。毒在上者。川芎湯下。毒在下者。牛膝湯下。輕

者十日。重者一月全愈。○濟世方。用佛前照過舊琉璃。燒存性。酒調下。日一二次。一月全愈。

凡人火燒。取廟中琉璃浮子。松樹厚皮做的。燒灰放地上。用盥覆蓋灰上。存性研末。用紅糖真香

油調傳。

臘利瘡。百藥備遺。用陳年佛前琉璃。只取底用。瓦上煨存性爲末。真麻油和搽。

喉癰。選奇方。用陳年琉璃煨爲末一錢。加薄荷末白蓬砂各五分。冰片少許。和勻。吹入立愈。

敗毒散。不問新久腫毒癰疽發背疔瘡。皆治家寶方。琉璃陳年破損者一個。棟樹子四兩。舊髮網巾

一頂。鳳凰衣四十九個。三七一錢。敗龜板炙五個。共爲末。每服五分。棟樹子湯下。

男女臙瘡。家寶方。先用白蘿蔔打爛。貼瘡口上。一日一換。三日毒血去盡。再用後藥。松香一兩。杏仁

三十粒。去皮尖油。黃丹八錢。輕粉五錢。舊琉璃燈三錢。火焙爲末。研細。麻油調搽。一日一換。數次即愈。

癰瘡。雲谷醫鈔。多年佛前舊琉璃焙存性。麻油調搽。癰瘡即消。

散結核。石臨初結核論。凡馬刀瘰癧一切結核。用破舊琉璃煨存性爲末。每服二錢。取微汗。此物乃

羊角製成。能療節中結氣。佐以養血和榮清熱解毒之品。標本並治。乃佳。○散結湯。熟地。當歸。白芍。川

芎。丹參。丹皮。柴胡。桔梗。元參。白蘇。各等分。水煎。沖琉璃末同服。

頸上癰瘡。舊琉璃燈燒灰。菜油調搽。神效。

長明酒。種福堂方。治痔漏神效。用積年舊琉璃燈。洗淨油膩。火煨研細。以紅酒服四錢。不過七日。管

自退去。

治遍身漏。醫宗彙編云。驗過良方。用陳年琉璃底三錢。人指甲麩皮炒一錢。象牙末一錢。辰砂一錢。蟬蛻去土五分。沒藥去油八分。白礬八錢。如漏在上身。加川芎六分。在下身。加牛膝六分。共爲細末。以黃蠟三兩。溶化入煎藥和勻。衆手急丸。如菉豆大。初服七八丸。每日加一九。至十六七丸止。無灰好酒送下。上身飽服。下身饑服。最忌雞及一切有葱之物。

油胭脂

藥性考。油胭脂平。豕膏合就。潤膚芻裂。活血點痘。西北風高。塗舒面皺。不龜手藥。古名非謬。○一名盃兒胭脂。用小錫盃盛。故名。色紅潤如膏。○百草鏡。製造油胭脂法。紅花汁一杯。白蠟二兩。微火熔化。攪勻。傾於磁盤內。待成薄餅。用碾麪杖碾數百遍。則膠黏如膏藥矣。假者係胭脂脚所造。不入藥。治血解毒。治痘疔。塗蜂咬。王氏準繩同珍珠末塗。

治痘瘡燕窩疔。○救生苦海。痘初起時。預免壞眼。用臨清濟寧好油胭脂點眼大眚。○普濟方有四聖丹。治小兒痘中疔。或紫黑而大。或黑壞而臭。或中有黑線。此痘十死八九。惟牛都御史得祕傳此方。點之最妙。用豌豆四十九粒。燒存性。頭髮灰三分。珍珠十四粒。炒研爲末。以油胭脂同杵成膏。先以簪挑破。啞去惡血。以少許點之。卽時變紅活也。

乳頭破裂。油胭脂蛤粉水飛傅之。不用蛤粉亦可。

治疹子眼。眼科要覽。用雞膽將油胭脂調勻塗上。雖眼突出能好。無雞膽。用田雞膽代之。亦可。
木套皮

古爲屐。今名木套。

治血風瘡。救生苦海。用木套皮燒灰。東丹礬各一錢。爲末。菜油和搽。

火漆

火漆乃造胭脂紫梗水。以染脂胚所漉之渣滓也。紫梗本名紫釧。出波斯真臘南番等處。有小蟲如蟻。緣樹枝造成。正同造白蠟一般。吾杭造胭脂者。藉以染製。然第用紫梗一味。則色不能紅。必須配以黃葉水同煎。色始紅豔。其所餘之渣。則火漆也。入藥只須研極細用之。中有枝梗不受研者。篩去。
物理小識。火漆一名紫膠。

治血崩。救生苦海。火漆不拘多少。入無油淨鍋內。令化。炒黃煙淨。見白煙起。退火取出。研末。空心時好酒和服三錢。重者不過三服。

腸風下血。不藥良方。火漆三錢。研細末。以豆腐皮分包作三十包。白滾水送下。至重三服即愈。
九種心痛。神方考。用火漆一味。燒灰存性。每服一錢。送下即愈。

七氣罌餅

此乃人家屋簷脊上用壓鎮不祥者。以七小罈橫疊相聚如七星狀。外以灰泥黏覆。入藥用年久者。王子接絳雪園方。罍小口瓶也。七氣者。日月風雨露霜雪也。七罍人家多置古屋上。廣漢前上層。生餅年深者良。火土結成。堅剛性利。復藉天之七氣。能透骨入髓。理傷續絕。入藥取純鋼。剉生剉末。研至無聲。水飛用。○慈惠編。接骨七釐散。中用朝天寶。卽人家屋上瓦。將軍前小瓶也。愈久愈妙。必要取其朝天之得精華者。研末入藥用。

接骨丹。絳雪園方。七氣罍口剉末。水飛一錢。古文錢。有半兩五銖。自秦漢鑄紅銅者佳。唐時開元錢亦可用。火煨醋淬七次。研至如塵粉無聲爲妙。用五分與罍末和勻。每服七釐。先用甜瓜子仁去殼三錢。嚼爛吐出。拌藥再服下。清酒過口。此方用七氣罍口古文錢。功專腐蝕壞肉。陳藏器云。能直入損處。鐸人斷骨。甜瓜子仁開腸胃之壅遏。通筋骨之機關。因丹藥釐數微甚。助以入胃轉輸。爲丹藥之嚮導也。

紅褐白

紅褐乃毛布。今名褐子。西人多以牛羊毳雜織而成。以茜草染則色紅。

治疔瘡。醫便用紅褐燒灰存性五錢。樹上自乾桃子燒灰存性五錢。爐甘石火煨黃色。童便淬七次。二錢五分。共爲細末。臨搽入片腦少許。其瘡先用椒葱湯洗淨。再搽藥。三次卽愈。

血崩。醫便六合散治血崩不止。諸藥不效。用此立止。此急則治其標也。杏仁皮燒存性。香附童便浸三日炒黑。舊紅鴉子燒存性。地膚子炒。舊櫻桃燒存性。壯血餘燒存性。蟹殼燒存性。陳蓮蓬燒存性。共爲末。每服三錢。用酸漿草汁一鍾。沖上熱酒一鍾。空心熱服。按此方初服反覺多。以漸而少。由紫色而紅。以至於無。卽止。既止之後。用十全大補湯二十劑調補。方斷根矣。

走馬牙疳。祝氏效方。黃蛻殼煨存性。研末一錢五分。黃連忌鐵器爲末五錢。枯樓根。膽礬煨。五穀蟲。要尾全者佳。瓦上煨存性。紅鴉燒存性。以上各五錢。爲末。加冰片二分。和勻。先以米泔水漱口。連吹數次。卽愈。吹後仍用泔水漱口淨去。

治臍血滲溼。救生苦海。用紅鴉燒灰油和傅。或用裁衣店中百家碎五色布。燒灰摻之。

清香散。治癖疾生牙疳。潰爛臭穢。萬病回春。用乳香沒藥。孩兒茶。輕粉炒。象皮炒灰。象牙焙黃。紅鴉炒灰。珍珠焙黃。海巴焙乾。各等分。爲細末。搽患處。立時止痛生肌如神。

白褐

治小兒牙疳。集驗方。銅綠水飛。雄黃水飛。五倍子炒焦。枯礬。白褐燒存性。烏梅肉炙乾。細辛去葉蘆炒焦。胡黃連炒焦。共八味。各等分。用老茶葉葱根煎湯。以雞翎洗去腐肉。見鮮血。然後用此藥搽上。

罽布

粵山錄。出新安。頭層本苧麻所治。漁婦以其破敝者。翦之爲條。縷之爲緯。以棉紗經之。煮以石灰。漂以溪水。去其舊染薯蕷之色。使瑩然雪白。布成分爲雙單。雙者表裏有大小絮頭。單者一面有之。絮頭以長者爲貴。摩挲久之。葳蕤然若西氈。起絨更好。或染以薯蕷。則其絲勁爽。可爲夏服。不染則柔。以禦寒。粵人甚貴之。亦奇布也。

小兒服之。可辟邪魅。

舊帽沿

治疳毒。外科正宗。下疳。用油透羅緞舊帽沿。燒灰。杭粉。瓦上煨黃色。等分。研極細。先用紅棗十五枚。甘草三錢。煎湯洗後。摻之。

金瘡。集驗方。用舊氈帽油口沿。燒灰。摻之。愈。

綿珠

綿有木棉絲綿二種。惟絲綿製服則有珠。新製衣每每有絲珠透出衣外。周履靖羣物奇制云。伏中裝綿布衣。無綿珠。秋冬則有。以燈草少許置綿上。則無珠也。入藥用舊衣內綿珠。取其襲人氣既久。其新衣透出衣外綿珠無用也。

治蠍虎咬。香油調塗。神驗。

紅絨

治秤勾瘡。此症小兒月內糞門上忽有瘡孔。卽此症也。救生苦海用紅絨燒灰二錢。珍珠五分。輕粉五分。兒茶二錢。血竭一錢。乳香一錢。爲末。乾摻。

棉紗

養素園方。此乃草棉花所紡線也。吳松人以之織布。名曰棉紗。本色者白。或染藍靛作青色。爲婦人縫紉之用。古用木棉。今用草棉。綱目服器部有綿。乃絲綿。故從絲。

性平。能透斑疹。傳信方。風疹斑瘡出不透快。用白棉紗二兩。檉柳一兩。共煎湯浴之。避風。頃刻透發。無檉柳。以櫻桃核代之。亦可煎服。

藍棉紗。此乃經靛染者。煎湯解毒。與藍汁同功。

舊頭繩

百草鏡。俗名紮根。乃婦人以之紮髮。入藥取油透棄去者良。綱目有巾及繳腳布。而無此。

治紅絲疔。蛇傷。紮束肉上。能令毒氣不透。

小兒一切頭瘡。秦中用云。燒灰油塗。立愈。

治難產。經驗廣集。用婦人舊頭繩一條。燒灰。加人參一兩。煎服。不論橫生逆生。服之順流而下矣。神。

奇不可思議。

北雁砂

出關東。菉豆色。如珠顆粒。擲盃中有響聲者真。明目。

治一切眼病。洪清遠方。用明目砂五分。用鍼刺入紅者佳。北雁砂三錢。再用羊肝一具。連膽不落水。刺開數路。不要剖開。將二味砂爲末。入肝內。以無灰酒二斤蒸熟。煎剩二盃。空心一服。晚飯後一服。以盡量爲度。羊肝配之一服完。不論眼病內障外障黑暗不明。無不神效。

烏金紙

皮金紙

江浙造紙處。多有兩面黝黑如漆。光滑脛薄。不中書畫。惟市舖用以裹珍寶及藥物作襯紙。又呼薰金紙。以其熏黑槌研而光也。

物理小識。造金箔。隔碎金以藥紙揮巨斧捶之。金已箔而紙無損。紙初褐色。久則烏金色。○魏良宰云。烏金紙惟杭省有之。其造紙非城東淳佑橋左右之水不成。其法先造烏金水。刷紙。俟黑如漆。再熏過。以槌石研光。性最堅韌。凡打金箔。以包金片打之。金成箔而紙不損。以市遠方。價頗昂值。蓋天下惟浙省城人能造此紙故也。

治下疳。集聽。用烏金紙銅杓內炒末。加冰片少許塗。

復明散。陳嘉木眼科要覽。專治翳膜遮睛。瞽者亦可復明。用七八歲童子口中吐出虻蟲一條。用竹刀剖開。清水洗淨。將新瓦以炭火焙乾。勿焦。研極細末。烏金紙包好。再用蓬砂四兩。將虻蟲包藏其中。一七日取出。以骨簪蘸藥點眼。一日三次。後將骨簪脚撥去眼中翳膜。熱水洗之。少頃又點。點完此藥。無不重明。

皮金紙

又名羊皮金。出廣東。凡金箔店皆有售者。呼皮金紙。

治跌仆擦傷。釘鞋打傷。足跟病久。陰瘡擦痛。并凍瘡。足跟腫爛。流水。凡小擦傷。刀傷。腫潰紅赤。皮光潮溼。皆效。看患處大小。以此剪取。將金面貼傷處。過宿即愈。毛世洪養生集

舊繖紙

綱目有桐油繖紙。止言治蛀幹陰瘡及疔瘡。疔汗而已。無他治法。今補之。

治纏腰丹。急救方。用舊繖紙燒存性。爲末。香油調傳。

對口瘡。祝氏效方。淡底白色者佳。一兩。陳繖紙燒灰五錢。將烏梅肉一兩。先打爛入末。再加生桐油搗勻。傅患處漸愈。

發背立效方。周氏家寶。千年石灰研爲細末。鐵杓內炒紫色。傾出磚上。待略冷。微有熱氣。不可太冷。

太熱三錢大川芎研細末二錢和勻入真麻油五六點用井水或河水調服遍身大汗出卽散矣若遇惡瘡可加黑繳紙灰三分照前服。

臙瘡。蔡毓晉方用人家蓋牆頭舊繳須多年經霜雪者取繳衣依瘡大小剪成一塊上用木鍼刺洞貼上三日另換一張每日翻貼貼上三張卽愈。○集聽方臙瘡以輕粉豬骨髓研勻攤舊繳紙上貼之。周氏家寶諸瘡隔紙膏臙瘡經驗膏隔紙膏脫身隔紙膏俱用舊繳紙夾藥貼。

包烟紙

此乃烟鋪內包烟外一層厚白紙係石灰槽浸造灰氣未去紙亦不韌止可包烟用名建紙近人食烟以其紙擦烟筒頭嘴令銅潔白可擦錫器武原朱進士醒蒼言北方朝士多貯此紙每日清晨盥額後以之拭面久之能轉黝爲白令光發如玉。

拭面去黝野汗斑美容顏發光豔。

粗草紙廁草紙

此乃稻草所造南貨店以之包物有厚薄二種厚者名銅板草紙入藥用。

發疹瘡。百草鏡折角草紙半張南貨店包物厚者是也煎服較檉柳尤透發。

小兒臙瘡。不藥良方急用大草紙燒灰傅之則不致變瘋癩或加枯礬或再加龍骨燒灰等分入麝

香少許撒之。

腸風下血。不藥良方。粗草紙燒灰。砂糖拌勻。開水服。

貝母團。經驗廣集。治羊兒瘋。百發百中。用川貝母去心一兩。研粉。用羅篩過。鋪大草紙一百張。一層草紙篩一下。百張草紙篩百下。然後用線縫之。入四盃水。煮乾。每清早取一張紙成團。煨過。滾湯泡汁飲之。服盡全愈。神妙無比。

廁草紙

此乃坑廁中拭過糞草紙。棄於地者。同壽錄云。傷寒內有一症名略蒂傷寒。非用此不能除也。覓此紙四十九張。燒灰爲末。水二盃。煎一盃。去渣飲之。效。

酒罈上紙

此乃蓋封酒罈口上紙。陳久者佳。以其得酒氣多。黴爛不堅韌。又脫去灰性也。

治皮膚間忽然血濺出。同壽錄。用此紙碎扯如楊花。攤於血出處。卽止。

燒酒草

此卽燒酒罈頭泥中之草。慈航活人書有此一種入藥。故補之。

治剪刀風。活人書云。其症腰生紅瘰。如物纏緊作痛。用鍼挑出血。取此草加鹽擦出汗。卽愈。

古瓦

綱目土部有烏古瓦。不言治癩毒。

治小兒生毒。救生苦海。已成形者。用多年古瓦研末。用細茶葉煎極濃汁和傅。留頭卽散。

蟬拱癩。用瓦片火煨醋淬七次爲末。菜油和搽。

消渴。用舊屋上瓦兩片。洗淨搥碎。以水煮濃汁。食後溫服一小盞。同齋錄

青龍背

龔廷賢回春云。鍋蓋面上垢膩名青龍背。可治瘰癧潰爛久不愈者。用此入烏龍膏治之。

烏龍膏。木鼈帶殼炒存性。去殼。側柏葉焙。人中血。卽亂髮也。燒灰。青龍背。紙錢灰。飛羅麵。各一錢。俱

爲末。好陳米醋調成膏。塗瘡上。外用紙貼。

絹篩籬

今呼篩子。有馬鬃織作底者。有絲絹作底者。入藥以絲絹者良。

治過月難產。彙集有急救過月難產仙方。用陳篩籬底一個。捲筒燒盪內。與產婦服。卽下。如產生之

兒身上皆有羅。其驗如神。

陳年竹燈蓋

治多年陰陽諸癬。救生苦海。用陳竹燈盞油透者。入尖底瓶內。瓶口安一鐵絲髻。將地挖一土坑。內安大盃一隻。將瓶倒覆盃上。瓶底朝天。週圍用礬糠填滿燒之。取滴下盃中之油搽之。效驗。○文堂驗集。治癬。多年油竹燈挂一個。火上烤出油汁如膠者良。另將五倍子去蟲炒研爲末。二味和一處。用陳醋火上溫熱和勻搽之。甚效。

臘梨頭瘡。張子卿祕方集驗。以酒飯店油透陳竹燈臺一個。劈碎。裝於瓷瓶內。口上用舊髻鐵絲覆於瓶上。倒轉下。再用一空瓷瓶。以此瓶合於下瓶口上。用火煨之。其汁溜下。取汁搽瘡。其效如神。

腦漏。百草鏡。竹燈絡子十年者。須覓鄉村中有油垢者。勿淨煨成炭。伏土存性。研細。每用一二錢。包豆腐皮清晨滾水吞下。陸續服盡。自愈。

腸癰肚癰神效方。便易良方云。右脚拘急是腸癰。左脚拘急是肚癰。取數十年舊油印竹燈臺。俗名善福。以一隻燒半過。不用水息悶。合成灰。研爲細末。陳三白酒沖服二錢或三錢。即愈。王站柱不藥良方云。此藥又治肺癰。極神效。

銅燈盞青

卽盞內之油垢。起銅綠者。入藥良。

治燕窩瘡。救生苦海。本名髮際瘡。生頭枕骨下髮盡處。以銅燈盞內青垢刮下研爛。擦之如神。

料絲

物理小識。滇金齒衛用瑪瑙石英屑汁。以北方天花點之。乃凝練爲絲。以作燈。近日丹陽松江皆能作料絲。李西涯書作縹絲。大內青瑣卽此物。

磨漿。能止血破血。

烏龍翅

汪連仕草藥方。烏龍翅卽焦火把。零落泥土中。經霜雪者佳。

治足爛至凶者。燒炭油搽。燒斑痧。焮神鬼箭。神效。

船篷箬

治耳內腫爛脹痛。救生苦海。用多年船篷箬燒灰存性。加冰片少許。研細吹入。

洋船璞

此乃海船底中。閒有楓木。舟人名曰龍骨。藥生其閒。形如菌蕈。乾之入藥。

治胃脘疼痛。

按潘之恆廣菌譜。舵菜。卽海船舵上所生菌也。不可多得。果爾。則宜入蔬部。留以俟考。

槽籬

治爛串。○毛世洪經驗集。凡乳癰串爛。年久不愈。洞見內腑。深陷不愈者。取搖船之櫓上首手捏之處。舊藤籬。剔下。以陰陽瓦上煨末。竹管紮。細篩。日日搽之。如乾處。以香油調搽。不過半月全愈。

漆盤上漆

治羊眼漏。 救生苦海。此症生足脛骨上。生一孔。無膿無血。惟流清水。大痛。用多年漆盤刮下漆。燒灰搽之。愈。

油木梳

木梳以木製成。用以通髮。黃楊木者能清火。石楠木者理風。其器以此二木造者爲最。餘雜木及駝骨牛角等梳。不入藥。或曰牙梳可辟邪。皂角木梳不墮髮。柏木鉛梳皆能烏髮。總不若常用黃楊石楠二木爲佳也。綱目梳篋合一不分。所載治法亦夥。惟油梳尙遺其功用。因補之。

治肺痿。 救生苦海。油木梳須二三十年者一個。燒存性。滾水和服。甜酒亦可。

治五淋。 同壽錄。以多年木梳燒存性。空心冷水調下。男用男梳。女用女梳。神效。

拗頸。 海上名方。此病俗呼落枕。乃頸項夜閒悞落枕下。或偶被閃挫。血滯而強。作酸疼。以舊油梳火上烘熱。梳背於疼處極力刮之。自愈。

誤食螞蝗。 俞潛山云。曾誤食此。腹中作瀉。不時疼痛。瀉血。以黃土漿水他藥試之。多不效。有教以取

多年舊油梳燒灰。酒調服。一夕蝗皆化水而下。真神方也。

衣帶

治蛇纏。救生苦海。用繫腰帶煨存性。研細和好醬塗。或加水龍骨和柿漆水塗。

刀鞘

治中惡腹痛。救生苦海。用刀鞘燒灰水服。

舊竹筴

治蜈蚣傷。救生苦海。將小頭燒過伏土。取少許研細傅之。立愈。

草鞋鼻上布

綱目履屨鼻繩下有草鞋鼻。無取布法。亦不知其有發瘡之功。今補之。

治兒患瘡疹不發。取破草鞋鼻上所衰之布七八條。煎湯服。立效如神。周寶生醫通。

織機上草辮

楊春涯驗方。治白蛇纏。此物以陳爲好。燒灰存性。麻油調搽。紅蛇纏亦治。

肉臺上屑

綱目故木砧條。列几上屑。止言治噉瘡唇耳等瘡。乾霍亂蟲牙等症。急救方言其治手毒如神。因急補

之。

治手掌連虎口邊腫毒。用豬肉臺上刮下木屑如膏。作餅貼患處。即愈。

吐血。慈航活人書。醃臘肉店中切肉木墩上。刮取肉垢。火上燒枯。勿令成白色。存性研末。酒沖服。

狗咬。楊春涯驗方。刮取切肉墩上油垢和沙糖拌傅。神效。

盛米栲栳爛籬底

治血臟。楊春涯驗方。用二三十年盛米栲栳一隻。擊碎煎湯服。一二次即消。

爛籬底

此乃人家盛米竹器。浙人呼爲淘籬。以竹絲織成。用以浙米者。舊者多用以貯柴灰淋水洗衣。年久則

爛。

截經。同壽錄云。婦人行經不止。服此可截。用頭紅花。爛籬底。爛八搭草鞋鼻子。蓮房。此四味俱燒灰

存性。共爲末。每服一錢。黃酒送下。不過三服。其紅立止。

砂壺

出宜興紫泥者佳。入藥吸毒用。取其口光滑而薄。不傷肌肉也。

治傷寒不出汗。用吸法。以二砂壺各盛燒酒八分。重湯煮滾。將酒傾去。即將壺口對臍上合住。使吸之。

緊輪換汗出即愈。○瘰癧破爛拔毒法。將先破處麪糊作餅貼上。用小砂壺二個。燒酒煎滾。去酒。以熱壺口覆於麪餅上。熏瘡如拔火壺一樣。壺冷。又易一壺。如此數次。將毒氣拔盡。即愈。熏後用豬膽熬成膏。貼瘡口。此方神效。○治獸蟲咬傷。并風寒一切毒。用砂燒酒壺二個。盛大半壺燒酒。先以一壺火上令滾無聲。傾去酒。即按在破口上。拔出汚黑血。水滿則自落。再以次壺仍按瘡上。輪流提拔。以毒盡爲度。俱見經
驗廣集按王站柱不藥良方。治瘋狗咬傷。用砂壺吸法。與此同。吸後再拔去頂上紅髮。即愈。

靈鶴蓋

李金什曾客淮南。言山陽一帶洲渚皆蘆葦。產鶴多。卵育於中。村人有能識其期者。俟鶴下卵後。竊歸入鍋煮熟。急以涼水沃之。看卵殼不熱。復置其窠。鶴不知而尤煦伏之。過三七日。其卵中黃白復鮮。如故。又竊之歸。急煮而又納窠。鶴又伏之。如是者三次。則鶴卵外殼厚如紫玉。而盃成矣。復竊之歸。鋸去其頂。外則鑲飾金玉。令成盃形。名靈鶴蓋。注酒其中。輒有一小鶴影浮酒上。云食之益壽延年。且能治心疾。不易得。有市者價亦不賈。

花簪

安神魂。定心悸。小兒用之。除驚癇。孕婦用之。養胎稀痘。出外帶之。辟蛇蠱及一切毒。

楊春涯驗方。治乳癰初起時。將女人頭帶花簪。對向日中打圈。口中默念天上一朵黑烏雲。地下女子

害乳疹。我今特授金簪上。金簪化去永不疼。如此七遍。將簪交付婦人圈患處。即好。

小兒破鞋

接骨。家寶方。用市鎮上乞小兒破鞋一隻。燒灰。白麪等分。好醋調成糊。傅患處。以絹束之。杉木板夾好。須臾。疼止。骨接。有聲爲妙。

夏布舊蚊帳

江西麻布染藍。入夏作蚊帳。名夏布。今人以此舊帳作漆器坯。最佳。

治走游風。王化九簡便方。用青夏布舊蚊帳。燒灰存性。麻油調傅。如再發再傅。

陰奇癢難忍。不藥良方。用青夏布舊蚊帳。燒灰存性。麻油調搽。即愈。

廁上椽木板

尿板

此即毛坑上椽子。多年爲糞氣熏漬。其解毒之功。不下糞清也。

治紅絲疔。敬信錄。紅絲疔。先將鍼挑斷其絲。將多年糞坑上碎木椽子。煨灰研細。用飴糖拌塗。留頭。

疔即拔出。

尿板。治手足瘡無力。不能收口。家寶方。用多年尿浸爛白色木板。煨存性爲細末。加冰片摻之。立時

收口。

白秋霜

萬表積善堂方。白秋霜。卽多年糞缸底結成白霜。須經風雨者。入藥炭火煨紅。醋淬九次用。綱目人部。溺白涎。爲人中白。乃溺涎也。且所列主治及附方。皆無接骨治傷之說。特補其缺。

治跌撲損傷閃挫。骨傷極重者。研極細末。每服五分。好酒調下。萬表

陳海曙云。凡多年廁坑底石板背後。有白胎如雪結其閒。擊取微有穢氣。陳久亦無。然糞力透石。故其精華凝聚於此。能清火毒。○王聖俞云。一名糞霜。曾見小兒瘡痘初愈者。忽然肺燥咽乾唇裂。目中出火。滿面紅赤。此火毒壅遏未化。滯於上焦。每服此藥一二錢。不數日全愈。○敏按蔣儀藥鏡云。泥宿糞坑之底。疔腫發背。止痛當塗。而霜又其精華也。大抵清火解毒。功用亦不甚相遠。

拾遺卷九中

禽部

燕窩素燕

一名燕蔬菜。從新云。出漳泉沿海處有之。乃燕銜小魚。春壘之窩中。人取之。閩小記云。燕取小魚。黏之於石。久而成窩。有烏白紅三色。烏色品最下。紅者最難得。能益小兒痘疹。白色能愈痰疾。泉南雜志。閩

之遠海近番處。有燕名金絲者。首尾似燕而甚小。毛如金絲。臨卵育子時。羣飛近沙。沙泥有石處。啄蠶螺食之。蠶螺背上肉有兩筋。如楓蠶絲。堅潔而白。食之可補虛損。已痢勞症。此燕食之。肉化而筋不化。并津液嘔出。結爲小窩。附石上。久之與小雛鼓翼而飛。海人依時拾之。故曰燕窩也。似此則形狀功用時候族類。俱有可信。○嶺南雜記。燕窩有數種。日本以爲蔬菜。供僧。此乃海燕。食海邊蟲。蟲背有筋不化。復吐出而爲窩。綴於海山石壁之上。土人攀援取之。春取者白。夏取者黃。秋冬不可取。取之則燕無所棲。凍死。次年無窩矣。○香祖筆記。燕窩紫色者尤佳。○崖州志。崖州海中石島有玳瑁山。其洞穴皆燕所巢。燕大者如烏。啖魚輒吐涎沫。以備冬月退毛之食。土人皮衣皮帽。秉炬探之。燕驚撲人。年老力弱。或致墜崖而死。故有多獲者。有空手而返者。是爲燕窠之菜。○粵錄。海濱石上有海粉。積結如苔。燕啄食之。吐出爲窩。纍纍巖壁之間。島人俟其秋去。以修竿接鏟取之。海粉性寒。而爲燕所吞吐。則暖。海粉味鹹。而爲燕所吞吐。則甘。其形質盡化。故可以清痰開胃。云凡有烏白二色。紅者難得。蓋燕屬火。紅者尤其精液。一名燕蔬。以其補草木之不足。故曰蔬。榆肉產於北。燕窩產於南。皆蔬也。○宦遊筆記。燕窩出南海。日本諸國。春間取者色白。爲上。秋間取者色黃。次之。一種微黑而多毛。是揀擇所遺者。價亦不能廉。怯症人久服之。亦能潤肺止咳。功等參苓。○查浦輯聞。南燕歸海外水邊難達。因啄小魚肉作窩。口銜之而飛。飛倦。卽投窩水中。棲止其上。少息。復銜之而飛。故東南風則飄掠近岸。人就取之。○阮

葵生茶餘客話。許青巖松。方伯語予云。燕窩產海島中。窮巖邃谷。足力繩竿之所不及。估舶養小猿猴。善解人意。至山島間。以小布囊繫猿背上。縱之往升木深巖。盡剝塞囊中而歸。猿之去也。苦不得食。三數日始返。海客以果餌充囊中。俾之遠出不餓。拙者出卽剝塞囊中。歸而傾囊。不過數片。爲果餌占地也。其黠者將果餌傾巖竇間。剝塞滿囊。盡燕窩矣。空而復去。尤爲便捷。猿一值數百金。價數倍於拙者云。許謹齋黃門。每晨起食蔗漿燕窩一巨觥。以融軟爲度。謂他人皆生食也。終日不瀉。

味甘淡平。大養肺陰。化痰止咳。補而能清。爲調理虛損勞瘵之聖藥。一切病之由於肺虛不能清肅。下行者。用此皆可治之。開胃氣。已勞痢。益小兒痘疹。可入煎藥。或單煮汁服。○從新云。今人用以煮粥。或用雞汁煮之。雖甚可口。然亂其清補之本性。豈能已痰耶。有與冰糖同煎。則甘壅矣。豈能助肺金清肅下行耶。○物理小識。燕窩能止小便數。○逢原云。甘平無毒。烏銜海粉作窩。得風日陽和之氣。化鹹寒爲甘平。能使金水相生。腎氣上滋於肺。而胃氣亦得以安。食品中之最馴良者。惜乎本草不收。方書罕用。今人以之調補虛勞。咳吐紅痰。每兼冰糖煮食。往往獲效。然惟病勢初淺者爲宜。若陰火方盛。血逆上奔。雖用無濟。以其幽柔無剛毅之力耳。○張石頑云。暴得咳嗽吐血乍止。以冰糖與燕窩菜同煮連服。取其平補肺胃。而無止截之患也。惟胃中有痰溼者。令人欲嘔。以其甜膩戀膈故也。○食物宜忌云。壯陽益氣。和中開胃。添精補髓。潤肺。止久瀉。消痰涎。○嶺南雜記。紅色者治血痢。入梨加冰糖蒸食。治

膈痰。

何惠川云。翻胃久吐。有服人乳多吃燕窩而愈者。

老年痰喘。文堂集驗方。用秋白梨一個。去心。入燕窩一錢。先用滾水泡。再入冰糖一錢。蒸熟。每日早晨服下。勿間斷。神效。

噤口痢。救生苦海。白燕窩二錢。人參四分。水七分。隔湯頓熟。徐徐食之。立效。

素燕窩。月湖筆叢。近時素食中盛行一種素燕窩。寧波洋行頗多。形白而細長。空心虛軟。儼如食舖中餛子而細。有七八寸至尺長不等。望之晶瑩。握之輕虛。每三十餘枝作一束。廚人買得。湯沃之。卽起脹。蕤蕤然凝白。類官燕。以入素饌爲珍品。食之亦淡而少味。不知何物造成。或曰糯粉山穀爲之。何以見沸湯反脛美。或曰銅鉛之苗。產海外深山。食之可明目。近日始知有用者。不知然否。附記俟考。北硯食規。有製素燕窩法。先入溫水一盪。伸腰。卽浸入滾過冷水內。俟作料配菜齊集。另鍋製好。箊籬撈出。燕窩將滾湯在箊籬上淋兩三遍。可用軟而不糊。半燜用。

解食烟毒。

石燕

粵語。產西樵巖穴中。大如乳燕。足生翼末。綱目石燕條。引日華子本草。無治疖之說。今廣人用之。頗驗。

故補之。

治兒疳小兒羸瘦。取食即愈。諺曰：嬰兒瘦，探石鰈，即此。

蝙蝠腦

李氏蝙蝠腦丸中用之。治癰疽內陷。服之能令毒不攻心。

石錘

張氏曰：鈔乃大鵬之精也。鵬獨運無雌。海靜不波之日。見影在下。以爲雌也。其精溢出。墮土上爲土錘。木上爲木錘。惟石上爲不失本性。最佳。或墮水中。以婦女裙衣投水。自能躍出。

按石錘乃慎恤膠之類。

浸酒服。壯陽。令人有子。以薑酒解之。

鷓鴣涎蛋

鷓鴣形如鵝而色黑面紅。俗呼摸魚公。水鄉人家多養之。以捕魚。十月後飼以狗肉。則身暖不畏寒。雖破冰入水亦不瘵死。

治腎咳。俗呼頓嗆。從小腹下逆上而咳。連嗽數十聲。少住又作。甚或咳發必嘔。牽掣兩脅。涕淚皆出。連月不愈者。用鷓鴣涎滾水沖服。下咽即止。

蛋

能打胎。有不欲留孕者。取一個白水煮服。胎即化爲血水。從小便出。多則二服。無有不驗。

翠鳥舌

翠鳥即魚翠也。其舌大而可用。綱目魚狗下。止言其肉可治魚骨哽。而附以翡翠。亦云方書無用此者。其功效大約相同。今爲補其舌之用。

鍼頭風。集聽。翠鳥舌一個。以桐油浸曬乾。又浸又曬。硬如三棱鍼。方病發時。將鳥舌於頭上亂鍼。即愈。

白鶴雞

珍異藥品。文首白翼黃足。

治嗌痛。

鬱雞

珍異藥品。出廣中。○孫硤川云。此物在山中多食鬱金苗。故肉鬆脆。

解鬱散結氣。

鶻雞

出廣中。雞頭而烏喙。色黃。腹毛純黑。尾長下垂。鳴聲豁豁。性嗜蛇。其哺子時。取雛折其兩足。乃以蛇飼之。三日卽復。屢折屢復。捕食之。能治骨節折傷。

雪雞

生西陲。千百成羣。棲止雪中。西域聞見錄。喀什噶爾雪雞羣飛。極肥美。人以爲食。惟性燥耳。入藥雄者良。

煖丹田。壯元陽。除一切積冷陰寒痼癖之疾。較雪蓮尤效。

洋鴨

朱排山柑園小識。洋鴨種出海洋。形如鴨。紅冠羣羽。馴而善飛。雄者重至十斤。雌者如常。其性淫。雌雄相交。日必四五次。故房術用之。卵大如鵝子。味極美。以母雞伏之。約一月餘。則雛出矣。雛極易長大。助陽道。健腰膝。補命門。煖水臟。

烏鴉膽

此乃慈烏之膽。浙東最多。悉體肥黑而大。所在多有。予門人奉化徐朋圭居白巖。其地山僻徑幽。古木叢雜。言其土人有取鴉膽者云。烏鴉膽汁。晝則散注身目。故精聚而能見烟霄外物。夜則汁歸於膽。取

之法。須伺鴉夜睡時。乘其罔覺。以利刀斷其頭。急剖腹取之。膽汁全飽。並無漏溢。然後以線穿。陰乾入藥用。若取之不得法。或鴉被驚覺。縱殺得其膽。亦空皮無汁。不堪用。

明目開瞽。功勝空青。點青盲最驗。解藤黃毒。

爛弦風眼及翳障。不藥良方。烏鴉膽點之。卽愈。

鵝毛尿。涎。蛋殼。腿骨。喉管。

綱目鵝下載其毛。治射工毒。通氣辟癩。開噎。其屎治小兒鵝口。蒼鵝者可傳蟲蛇咬。而不知毛可治癰。屎更治犬咬。悉爲補之。

治癰毒。集驗方。用鵝毛煨灰一兩。明礬二兩。研末。麪糊爲丸。每服二錢。好酒下。

大麻風。赤水元珠參毛丸。治大麻風神效。苦參一斤。鵝毛八兩。煨存性爲末。陳米糊爲丸。桐子大。每服五十九。酒送下。一日二次。

神功至寶丹。王秋泉家傳祕方。專治男婦溜膿肥瘡。膿窠瘡。臘梨頭。遍身風癩。癰疹疥癬。瘙癢異常。麻木不仁。諸風手足酸痛。皮膚破爛。陰囊癢極。并婦人陰癢溼癢。酒九散。擦藥洗貼如神。隨病上下茶湯送下。日進二次。戒暴怒房勞。炙博發毒之物。苦參一斤爲末。鵝毛香油炒存性六兩。黃米糊丸。硃砂爲衣。此方與元珠治大麻風所用大同小異。因並存之。

按鵝白者能疎風。瀕湖謂其氣味俱厚。發風發瘡。莫此爲甚。而駁韓忞醫通以爲疎風大悞。殊不知鵝能發瘡生溼。火熏者并發火毒宿疾。害誠有之。而疎風之功。亦不可盡誣。至其毛與肉。則性尤不同。本經逢原云。昔人治癘風方中。取純白鵝通身之毛。及嘴足之皮。與肫肝內皮。固濟煨灰存性。和風藥用之。爲風藥之嚮導也。然不可遺失一處。遺一處。卽不能愈。又不可用雜色者。若有一處色蒼。風愈之後。其處肌膚色黑。正取其疎利而不燥。能和風藥之熯烈。而不用蒼色者。以純白鵝無毒耳。

絕胎方。保和堂祕方。用血管鵝毛燒灰。百草霜各一錢。行經後酒調下。終身無孕。○又周氏家寶方。用鵝毛一把。煨細。茶煎湯。經後服。永不生。此二方雖存。不可輕用。

寶生論有受打不痛法。用血管鵝毛七根。地龍七條。煨過。同乳香白蠟爲丸。好酒送下。

治癩癧初起。傳信方。白鵝大者二隻。取週身毛翎并口腳黃皮。新瓦焙焦爲末。分作十服。每日食後服之。服完卽愈。

治腫毒。救生苦海。用血管鵝毛一握。銅鍋炒焦。腐皮包裹。酒吞下。卽內消。初起者效。○諸腫毒痛甚。有膿卽潰。無膿卽消。用鵝毛燒灰一兩。雄黃三錢。川烏草烏各錢半。黃蠟鎔化。入前藥爲丸。每服一錢。好酒送下。嚴氏諸毒內消方。吳涵宇用鵝毛二個。炒蜈蚣十條。醋炒。穿山甲一兩。炒。殭蠶一兩。炒。全蠍五錢。洗。廣膠二兩。炒。桑黃二兩。炒。羊角屑二兩。炒。共爲末。每服三錢。砂糖調好酒下。以醉爲度。

發背疔瘡對口風毒。醫宗彙編穿山甲。蛇蛻。蟬蛻。蜈蚣。俱爲末。鵝毛全副。燒灰存性。全蠟。血管雞毛。二翅。燒灰。人指甲。用十分之一。敗龜板一個。殭蠶。俱爲末。每用一錢。酒下。

懷吞銅錢及鈎線。慈惠方。用鵝毛一錢。燒灰。慈石。阜角子。火煨。象牙一錢。燒存性爲末。每服五分。新汲水下。

艾火帶。乃炙火所傷。爛痛不可忍。同壽錄。用雉雞毛同鵝毛。燒灰傳之。效。

喉蟻癬。傳信方。用鵝毛灰三分。兒茶二錢。牛黃三釐。雄黃一錢。人中白一錢半。煨存性。如吃深。加珍珠煨存性一分爲末。先將生桐油探刷一番。後用藥吹入。加膽礬更妙。

鵝屎

救生苦海。治犬咬。以鵝屎傳之。不爛痛。

鵝涎

綱目止載治咽喉穀賊。今人治小兒鵝口瘡。甚效。

鵝蛋殼

急救方。癰疽無頭。用新生鵝蛋殼。燒灰存性。爲末。醋調傳。立出膿血。妙。

鵝腿骨

奇效方。犬傷日久發者。用鵝腿脰骨煨存性。研末。搽之。

鵝喉管

家寶方。治喉症。用鵝喉氣管一個。陰陽瓦炙黃色。冰片一分。共爲細末。吹二三次愈。

治赤白帶。家寶方。取鵝水喉管煨存性。研末。酒調臨臥服之。

鷹吐毛條

百草鏡。鷹每日食雀時。連毛與食。肉化而毛不化。聚成一團。如芡實大。次早吐出。收用入藥。綱目有鷹毛。無吐毛。故補之。○按鷹稟西方兌金之氣。其性猛烈而竄捷。故余居士以其頭治眩暈。王巖以其糞治食哽。皆取其得庚辛銳氣。一往無滯。反胃之症。食而復吐。久積於胃。不能運化。故旋出。大概由於憂鬱者居多。取此復吐之意。而又得其爽猛之性爲治。其義精矣。

治反胃。煨存性。研。醫方集聽。查將軍家傳噎膈方。用牙烏灑出毛肘。卽鷹吐鳥毛也。要七個。不可落地。用布接在架中。微火煨燥爲末服之。營內凡喂毛肘。但在下午。次日天明卽吐出。最易得。不可使肘落地。落地則不驗。

鷹條。本經逢原云。鷹屎中化未盡之毛。謂之鷹條。入陰丹陽丹用。不特取其翻之善脫。以治難脫之病。并取屎中未化之羽。以消目中未脫之翳。可謂妙用。

雄雞卵

茅崑來云。雞本南方積陽之象。於卦爲巽。五更則日臨巽位。故鳴。凡鳥雌卵而雄否。惟雞則雄者閒亦生卵。乃陽極而陰乘之。其卵較小於雌雞卵。殼堅如石。殼色微紅。入藥用。可安胎稀痘。○王槭秋燈叢話。古北口叭噠嶺。有喇嗎令巡檢張某。市雄雞卵。張笑曰。雄雞焉能生卵。故相難也。曰。非也。俗有斯言。卽有斯物。第覓之可得也。張漫應之。語其役。役曰。聞前村民畜雄雞。連生三卵。衆以爲不祥。嫗異而藏之。命役取送。喇嗎收其一。給價五十金。張詢所用。曰。能醫眼疾。年遠替者。得其汁點之。卽復明。與空青同。○陳藏器本草。今雞有白臺。如卵而硬。有白無黃。云是牡雞所生。名父公臺。二申野錄。成化二十三年。吳縣湯惟信家。雄雞生卵。平湖縣志。萬曆四十八年四月。施太史家。公雞生子。形如雀卵。色紫。史異纂。天啓二年。陝民王進榜家。白雄雞生卵。三岡識略。壬申二月二十九日。提標左營。韋元鼎。臍中。雄雞連生二卵。述異記。康熙甲戌十二月。松江吳南林家。雄雞生卵。大如鴿蛋。殼甚堅厚。椎破之。亦有黃白。白如凝脂不散。黃帶赤色。○質直談耳。嘉定湖南村民。錢嵩家。雄雞生卵。與雌無異。乾隆壬寅夏間事。○紀曉嵐先生云。雄雞卵大如指頂。形似閩中落花生。不能正圓。外有斑點。向日映之。其中深紅如琥珀。以點目。皆甚效。德少司空成。汪副憲承霈。皆嘗以是物合藥。然不易得。一枚可以值十金。阿少司農迪斯曰。是雖罕睹。實亦人力所爲。以肥壯雄雞閉籠內。縱羣雌繞籠外。使相近而不能相接。久而精氣

團結。自能成卵。此亦理所宜然。然雞秉巽風之氣。故食之發瘡毒。其卵以盛陽不洩。鬱積而成。自必蘊熱。不知何以反明目。又本草之所未載。醫經之所未言。何以知其能明目。此則莫明其故矣。汪副憲曰。有以蛇卵售欺者。但映日不紅。卽爲僞托。亦不可不知也。

敏按諸書所載雄雞生卵。自古有之。原非有異。據陳藏器所說。有白無黃。而述異記所載。則有黃有白。想本閒氣所生。其形色亦無一定。乾隆庚戌。臨安慈聖寺有放生雄雞。忽生卵。日產其一。如是旬餘。人以爲異。其卵較小。色紫而殼堅。爲一錫匠索去。予時適館臨安。聞而索之。已無有矣。錫匠徽人。亦云其卵白可入藥。故乞之歸里。然此物又不特入藥。李懷白先生云。曾見喇嗎誦黑經。用雄雞蛋。川中鬼師有用雄雞蛋以行禳者。白蓮教則又需以解魘迷術。今人徒詫其異。而不知天生此正所爲世用也。安胎稀痘開竅。

